


GB  
1327.  
H8  
1892























漢 卷 水  
循 跡 證  
凡 壽



光緒十八年  
廣雅書局刻



序

夫天下之至變者莫如水或千百年而變或數十年而變或一二年而變觀其趨決無常遷徙不定載籍所陳靡得而盡也然其中名號雖殊源流本一學者加以攷證則古今不變之經改易之跡猶可如指掌焉自古言水道者山海經雖荒邈難稽而支源可尋外此最詳者莫如禹貢其次則有漢書地理志嗣後水經有作酈氏有注加以應劭闕駟杜預郭璞之徒參稽引證厥名猶詳至宋元以後世競新名舊蹟漸廢而班氏之所記始微矣以漢志上攷禹貢諸水禹貢河入海在碣石志則改從章武禹貢江入海在中江志則改從北江禹貢嶓冢導漾東流爲漢志則有西漢東漢之分禹貢導黑水至于三危志則僅記黑



水祠于滇池而不詳其所出蓋以志上距禹貢已歷二千餘年  
其所言乖異宜無怪其然也水經撰于和順以後去志未遠淇  
水至黎陽入河而止水經則自內黃以下盡曰淇流沮水與沔  
水互通水經卽以東狼谷爲沔水所出汝水出定陵水經謂在  
梁縣沛水至乘氏爲泗水水經則通名之曰濟它如易湖漢爲  
贛水改鬱水爲溫水河東則詳澮凍九江則出肥施枝分派別  
不可悉舉降而下之則又無論矣班氏身爲蘭臺令史得見天  
下圖籍故其所記約而能該詳而有法東京大儒如許君撰說  
文解字鄭君注尚書周禮所引地說多與志同則其書之精審  
不苟取重後世有自來已頤煊劉覽有年因取班氏所記可名  
者三百六十一無名者一百三十一隨其所入條分縷繫又復



錯舉古書證其同異別爲四卷首記北方諸水次記東南諸水次記西南諸水末仿水經之例記以地澤所在俾學者窮源竟委觸目可知用以推當時之古道息衆論之紛爭則區區之述亦未必無補于來哲云爾嘉慶九年十二月八日臨海洪頤煊書于橐城官舍



七

水後濟於干來西云爾蔡邕八平十二民八日  
漢書卷之九



漢志水道疏證卷二

臨海洪頤煊撰

金城郡河關縣積石山在西南羌中河水行塞外東北入塞內至章武入海過郡十六行九千四百里

山海經海內昆侖之虛在西北河水出東北隅以行其北西南又入勃海又出海外卽西而北入禹所導積石山郭璞曰河南出昆侖潛行地下至蔥嶺出于闐國復分流岐出合而東流注勃澤已復潛行南出于積石山而爲中國河也水經積石在隴西河關縣西南後漢書注積石山在今鄯州隴支縣南卽禹貢云導河積石是也案禹貢河自碣石入海溝洫志周譜云定王五年河徙武帝紀元光三年春河水徙從頓



邱東南流入勃海此志所記之河道也水經敘河水自黎陽以下有河水故瀆而以漯水爲河水正流蓋元始以後所改變矣河自河關至章武所過有金城天水武威安定北地朔方五原雲中定襄雁門西河上郡河東左馮翊河內河南魏郡東郡清河平原信都勃海二十二郡今本作十六者字之誤也

金城郡白石縣離水出西塞外東至枹罕入河

水經注離水導源塞外羌中東北流又東逕白石縣故城南又東逕枹罕縣故城南又東北出峽北流注于河

隴西郡臨洮縣洮水出塞外羌中北至枹罕入河

說文解字洮水出隴西臨洮東北入河水經河水又東過隴



西河關縣北洮水從東南來注之注沙州記曰洮水與墊江水俱出羴臺山羴臺西傾之異名也洮水東北流逕吐谷渾中又東逕臨洮縣故城北又北逕安故縣故城西又北逕降狄道故城西北入河括地志羴臺山在洮州臨澤縣西南三

百三十六里

謹案水經注降狄道戴校本據漢書刪降字

金城郡臨羌縣北則湟水所出東至允吾入河

說文解字湟水出金城臨羌塞外東入河水經注王莽更允吾爲修遠縣河水逕其南西有湟水出塞外東逕西王母石室石釜西海鹽池北故闕駟曰其西卽湟水之源也東逕臨羌縣故城北又東逕安夷縣故城又東逕允街縣故城南又東逕枝陽縣又東流注于金城河卽積石之黃河也



金城郡浩亶縣浩亶水出西塞外東至允吾入湟水

水經注湟水又東南逕小晉興城北又南與闔門河合卽浩亶河也水出西塞外東入塞內逕敦煌酒泉張掖南又東逕浩亶縣故城南又東流注于湟水元和郡縣志湟水縣浩亶水今謂之闔門水經縣東去縣五十五里

謹案闔戴校本作閭

金城郡允吾縣烏亭逆水出參街谷東至枝陽入湟

水經注湟水又東逕枝陽縣逆水注之水出允吾縣之參街谷東南流又東逕枝陽縣故城南東南入于湟水元和郡縣志廣武縣烏逆水在縣西南二十許里

金城郡令居縣澗水出西北塞外至縣西南入鄭伯津

水經注湟水又東逕允吾縣北爲鄭伯津與澗水合水出令



居縣西北塞外南流逕其縣故城西又南流注鄭伯津

安定郡朐卷縣河水別出爲河溝東至富平北入河

水經注河水於此有上河之名也又云河水又東北逕廉縣故城東河水又北與枝津合水受大河東北逕富平城所在分裂以溉田圃北流入河今無水爾雅曰滽反入言河決復入者也河之有滽若漢之有潛也

定襄郡武進縣白渠水出塞外西至沙陵入河

水經注白渠水出塞外西逕定襄武進縣故城北又西南逕雲中縣故城南又西北逕沙陵縣故城南其水西注沙陵湖定襄郡武皋縣荒干水出塞外西至沙陵入河

水經注荒干水出塞外西南逕武皋縣又南逕原陽縣故城



西又西南注沙陵湖湖水西南入于河

上郡白土縣圖水出西東入河

史記匈奴列傳作圖洛之間晉灼曰圖音器三倉作圖顏師古曰圖水卽今銀州銀水是也書本作圖後轉寫者誤爲圖耳水經注圖水出上郡白土縣圖谷東逕圖陰縣南東流注于河

太原郡汾陽縣北山汾水所出西南至汾陰入河過郡二行千三百四十里

山海經管涔之山汾水出焉而西流注于河淮南子汾出燕京十三州志曰亦管涔之異名也元和郡縣志靜樂縣管涔山在縣北一百三十里汾水源出焉水經汾水出太原汾陽



縣北管涔山至汾陰縣北西注于河郭璞曰今汾水出太原  
晉陽故汾陽縣東南經晉陽西南經西河平陽至河東汾陰  
入河過太原河東二郡

太原郡晉陽縣龍山在西北晉水所出東入汾

山海經縣雍之山晉水出焉而東流注于汾水水經晉水出  
晉陽縣西縣襄山又東過其縣南又東入于汾水魏書地形  
志晉陽西南有懸襄山一名龍山晉水所出元和郡縣志在  
縣西南十二里

隴西郡首陽縣禹貢鳥鼠同穴山在西南渭水所出東至船司  
空入河過郡四行千八百七十里

山海經鳥鼠同穴之山渭水出焉而東流注于河又云渭水



出鳥鼠同穴山東注河入華陰北水經渭水出隴西首陽縣渭谷亭南鳥鼠山至華陰縣北又東入于河郭璞曰鳥鼠同穴山今在隴西首陽縣渭水出其東經南安天水略陽扶風始平京兆宏農華陰縣入河括地志渭水源出渭原縣西七十六里鳥鼠山東流入河過隴西天水右扶風左馮翊四郡右扶風汧縣汧水出西北入渭

說文解字汧水出扶風汧縣西北入渭水經注汧水出汧縣之蒲谷鄉弦中谷決爲弦蒲藪水有二源一水出縣西山東逕汧縣故城北流注于汧汧水又東會一水發源南山西側又東南逕隃麋縣故城南東南逕郁夷縣逕平陽故城南又東流注于渭括地志汧水源出隴州汧源縣汧山東入渭



右扶風武功縣斜水出衙領山北至鄠入渭

水經渭水又東過武功縣北注斜水出縣西南衙領山北歷斜谷逕五丈原東水出武功縣故亦謂之武功水其水北流注于渭

右扶風漆縣漆水在縣西

山海經兪次之山漆水出焉北流注于渭郭璞曰漆水出岐山說文解字漆水出右扶風杜陵岐山東入渭一曰入洛水經漆水出扶風杜陽縣兪山東北入于渭注漆水出杜陽縣之漆谿謂之漆渠故徐廣曰漆水出杜陽之岐山者是也括地志漆水源出岐州普潤縣東南岐漆山漆谿東入渭

右扶風杜陽縣杜水南入渭



水經注杜水出杜陽山謂之杜陽川在會漆水東逕杜陽縣故城東又南流注于渭

右扶風鄠縣鄠水出東南又有潏水皆北過上林苑入渭

水經渭水過槐里縣南又東豐水從南來注之張揖上林賦注豐水出鄠南山豐谷括地志豐水源在雍州長安縣西南山豐谷元和郡縣志鄠縣豐水出縣東南終南山白發源北流經縣東二十八里北流入渭呂忱曰潏水出杜陵縣水經注渭水又東北逕渭城南而沈水注之其水上承皇子陂于樊川其水西北流又北逕長安城西又北流注渭亦謂是水爲潏水也

右扶風鄠縣成國渠首受渭東北至上林入蒙籠渠



水經注盩厔縣北有蒙龍渠上承渭水于郿縣東逕武功縣東爲成林渠東逕縣北亦曰靈軹渠淖渠以引堵水案成林渠卽成國渠之譌元和郡縣志郿縣成國渠在縣東北九里水經注又云渭水又東會成國故渠渠魏尙書左僕射衛臻征蜀所開也其瀆上承汧水於陳倉東東逕郿及武功槐里縣北又東逕茂陵縣故城南又東逕平陵縣故城又東南注于渭當由後人改鑿非志之所云矣

京兆尹南陵縣瀆水

舊本誤作汧水

出藍田谷北至霸陵入霸水霸水

亦出藍田谷北入渭

說文解字瀆水出京兆藍田谷入灞水經瀆水出京兆藍田谷北入於灞注瀆水出南陵縣之藍田谷西北流與一水合



水出西南莽谷東北流注澹水澹水又北歷藍田川北流注干霸水水經渭水又東過霸陵縣北霸水從縣西北流注之注古曰滋水秦穆公霸世更名滋水爲霸水以顯霸功水出藍田縣藍田谷元和郡縣志藍田縣霸水卽秦嶺水之下流東南自商州上洛縣界流入又西北合澹水入渭藍田山一名玉山一名覆車山在縣東二十八里

安定郡涇陽縣开頭山在西禹貢涇水所出東南至陽陵入渭過郡三行干六十里

說文解字涇水出安定涇陽开頭山東南入渭郭璞曰今涇水出安定朝那縣西开頭山至京兆高陵縣入渭水經注渭水東逕霸城縣北與高陵分水左則涇水注之括地志涇水



源出原州百泉縣西南笄頭山涇谷元和郡縣志百泉縣涇水源出縣西南涇谷過安定右扶風左馮翊三郡

右扶風汧縣芮水出西北東入涇

山海經龍首之山苕水出焉東南流注于涇水案苕當爲芮水經注芮水出小隴山元和郡縣志華亭縣小隴山在縣西四十里

安定郡烏氏縣烏水出西北入涇

舊本作入河誤

續漢志烏枝補注本傳有龍池山地道記曰烏水出太平寰宇記烏水出都盧山有西烏水又東北逕烏氏縣東注于涇左馮翊襄德縣洛水東南入渭

周禮雍州其浸渭洛注洛出懷德賈公彥曰此洛卽詩云瞻



彼洛矣一也與禹貢導洛自熊耳者別水經渭水又東過華陰縣北注渭水東南洛水入焉闕駟以爲漆沮之水晉灼曰水經洛水出上郡雕陰秦冒山過華陰入渭卽漆沮水也程大昌曰諸家言洛卽漆沮所謂洛水者地理志曰出北地歸德縣戎夷中今案其自入塞後逕鄜坊同之三州乃始入渭孔安國輩謂自馮翊懷德縣入渭者是也

北地郡歸德縣洛水出北蠻夷中入河

山海經白於之山洛水出于其陽而東流注于渭淮南子洛出獵山高誘曰獵山在北地西北夷中說文解字洛水出左馮翊歸德北夷界中東南入渭案志上記其委此記其源二洛本一水故說文卽合爲一與志同也所云入河者由渭以



入河也

北地郡直路縣沮水出東西入洛

說文解字瀘水出北地直路西東入洛水經瀘水出北地直路縣東過馮翊役翊縣北東入於洛注今水自直路縣東南又東逕粟邑縣故城北其水又東北注於洛水也

宏農郡宏農縣衡領

衡領舊本作衡山領

下谷燭水所出北入河

水經注燭水有二源左水南出于衡嶺世謂之石城山其水東北流逕石城西東北合右水右水出石城山東北逕石城東東北入左水燭水又北入門水門水又北逕宏農縣故城東而注于河太平寰宇記恆農縣衡山嶺在縣西南三十五里



宏農郡上雒縣禹貢雒水出豕領山東北至鞏入河過郡二行  
千七十里

山海經謹舉之山洛水出焉又云洛水出洛西山東北注河  
入成臯之西水經洛水出京兆上洛縣謹舉山東北過鞏縣  
入干河杜預曰雒水出上雒縣豕領山東北經宏農至河南  
鞏縣入河元和郡縣志鞏縣洛水東經洛汭北對琅邪渚入  
河謂之洛口過宏農河南二郡

宏農郡盧氏縣熊耳山在東伊水出東北入雒過郡一行四百  
五十里

山海經蔓渠之山伊水出焉而東流注于洛郭璞曰今伊水  
出上洛盧氏縣熊耳山東北至河南洛陽縣入洛水經伊水



出南陽魯陽縣西蔓渠山又東北至洛陽縣南北入洛過河南郡

河南郡穀成縣禹貢瀍水出潛亭北東南入雒

續漢志穀城縣瀍水出補注博物記曰出潛亭山水經瀍水出河南穀城縣北山又東過洛陽縣南又東過偃師縣又東入于洛注穀城縣北有潛亭瀍水出其北梓澤中括地志瀍水出洛州新安縣東南流至洛州郭內南入洛

宏農郡新安縣禹貢澗水在東南入雒

山海經白石之山澗水出於其陰西北流注于穀水說文解字澗水出宏農新安東南入洛水經澗水出新安縣南白石山東南入于洛注世謂是山曰廣陽山水曰赤岸水亦曰石



子澗東北流歷畎谷東坂東卽周書所謂我卜澗水東言是水者也括地志澗水源出洛州新安縣東白石山東北與穀水合流經洛州郭內東流入洛

宏農郡黽池縣穀水出穀陽谷東北至穀成入雒

山海經傅山之西有林焉曰墡冢穀水出焉而東流注于洛郭璞曰今穀水出穀陽谷東北至穀城縣入洛河水經穀水出宏農黽池縣南墡冢林穀陽谷東北過穀城縣北又東過河南縣北東南入于洛注今穀水出于嶠東馬頭山穀陽谷東北流歷黽池川亦謂之彭池穀水出處也

上黨郡穀遠縣羊頭山世靡谷沁水所出東南至滎陽入河過郡三行九百七十里



說文解字沁水出上黨羊頭山東南入河水經沁水出上黨  
涅縣謁戾山又東過武德縣南又東南至滎陽縣北東入于  
河注或言出穀遠縣羊頭山世靡谷元和郡縣志綿上縣羊  
頭山一名謁戾山在縣東北五十里沁水所出過上黨河內  
河南三郡

上黨郡泫氏縣楊谷絕水所出南至壄王入沁

水經注絕水出泫氏縣西北楊谷東南流逕泫氏縣故城北  
與泫水會東南入高都縣右入丹水太平寰宇記高平縣絕  
水在縣西北三十里源出髑髏山楊谷案水經注自此以下  
至入沁俱稱丹水太平御覽引志作泫水水經注泫水導源  
縣西北泫谷與絕水源別



上黨郡高都縣莞谷丹水所出東南入絕水

水經注丹水出上黨高都縣故城東北阜俗謂之源源水山海經曰沁水之東有林焉名曰丹林丹水出焉卽斯水矣丹水自源東北流又屈而東注左會絕水丹水又東南出山逕鄴城西又西逕苑鄉城北東南注于沁

河內郡共縣北山淇水所出至黎陽入河

山海經沮洳之山淇水出焉南流注于河說文解字淇水出共北山東入河一曰出隆慮西山水經淇水出河內隆慮縣西大號山高誘曰大號山在河南共縣北或曰在隆慮西水經注淇水歷舊淇水口東流逕黎陽縣界南入河溝洫志遮害亭西十八里至淇水口是也水經淇水又東過內黃縣南



爲白溝屈從縣東北與洹水合又東北過館陶縣北又東過清淵縣西又東過廣宗縣東爲清河又東過武城縣西又東過廣川縣東又東過脩縣南又東過東光縣西又東北過南皮縣西又東北過浮陽縣西又東北過深榆邑入于海案水經淇水與黃澤清河洹蕩諸水亂流通稱志不謂之淇水也上黨郡壺關縣沾水東至朝歌入淇

說文解字沾水出壺關東入淇水經注沾水出壺關縣東沾臺下泉流發于西北隅又東流注于淇元和郡縣志壺關縣羊腸坂在縣東南一百六里沾水出焉

河內郡蕩陰縣蕩水東至內黃澤西山羨水所出亦至內黃入蕩



說文解字蕩水出蕩陰縣東入黃澤水經蕩水出河內蕩陰縣西山東又東北至內黃縣入于黃澤溝洫志內黃界中有澤方數十里水經注羗水出蕩陰西北韓大牛泉又東流逕羗城北又東歷黃澤入蕩水太平寰宇記蕩陰縣蕩水在縣治北源出縣西牟山去縣三十五里羗水源出縣西北山下元和郡縣志內黃縣黃澤在縣西北五里

魏郡內黃縣清河水出南

續漢志魏郡內黃縣清河水出水經淇水東北過廣宗縣東爲清河案自此以下至入海注皆謂之清河

魏郡鄴縣故大河在東北入海

續漢志魏郡鄴有故大河水經河水又東北過黎陽縣南河



之故瀆出焉注溝洫志曰河之爲中國害尤甚故導河自積石歷龍門醴二渠以引河一則漯川今所流也一則北瀆王莽時空故世俗名是瀆爲王莽河也史記正義河至冀州分布爲九河下至滄州更同合爲一大河名曰逆河而夾右碣石入于勃海案水經東漢人所撰故以漯川爲河水正流其北瀆王莽時空者疑卽志至章武入海之道也此故大河卽王橫所云禹之行河水本從西山下東北去者

魏郡館陶縣河水別出爲屯氏河東北至章武入海過郡四行千五百里

溝洫志自塞宣房後河復北決於館陶分爲屯氏河東北經魏郡清河信都勃海入海水經河之故瀆自沙邱堰南分屯



氏河出焉注一水分大河故瀆北出爲屯氏河逕館陶縣東東北出又云屯氏河故瀆自別河東逕甘陵之信鄉縣故城南又東逕甘陵縣故城北又東逕靈縣北又東北逕鄆縣與鳴犢河故瀆合上承大河故瀆于靈縣南地理志曰河水自靈縣別出爲鳴犢河者也案屯氏河自館陶別出至章武入海與大河同也

清河郡靈縣河水別出爲鳴犢河東北至薳入屯氏河

溝洫志元帝永光五年河決清河靈鳴犢口而屯氏河絕水經注大河故瀆又東北逕靈縣故城南河水于縣別出爲鳴犢河十三州志曰鳴犢河東北至薳入屯氏

清河郡信成縣張甲河首受屯氏別河東北至薳入漳水



水經注屯氏別河故瀆又東北逕信成縣張甲河出焉張甲故瀆又東北至脩縣東會清河十三州志曰張甲河東北至脩縣入清漳者也元和郡縣志宗城縣張甲河在縣南二十五里經城縣張甲枯河東去縣十里

河內郡隆慮縣洹水

舊本誤作國水

東北至信成入張甲河過郡三行

千八百四十里

水經淇水東過內黃縣南爲白溝屈從縣東北與洹水合又云洹水出上黨泫氏縣東過隆慮縣北又東北出山過鄴縣南又東過內黃縣北東入于白溝注水出洹山山在長于縣也郭璞曰洹水出汲郡林慮縣東北至魏郡長樂入清水過河內魏清河三郡



平原郡平原縣有篤馬河東北入海行五百六十里

溝洫志孫禁以爲今可決平原金隄閒開通大河令入故篤馬河至海五百餘里續漢志平原補注地道記曰有篤馬河水經注屯氏別河南瀆自平原城北首受大河故瀆東出亦通謂之篤馬河卽地理志所謂平原縣有篤馬河東北入海行五百六十里者也

上黨郡沾縣大窰谷清漳水所出東北至阜成入大河過郡五行千六百八十里

謹案水經漳水東北過阜城縣與滹沱河會阜城故信都之昌成非勃海阜城此作阜誤

說文解字清漳出沾山大窰谷北入河郭璞曰清漳出少山大要谷至武安縣南入于濁漳或曰東北至邑成入于大河也案水經清漳水出上黨沾縣西北少山大窰谷東至武安



縣南黍窖邑入于濁漳濁漳水又東北過成平縣南合清河  
又東北過平舒縣南東入海注大河故瀆又東北至東光縣  
故城西而北與漳水合志漳水入河不入海也過上黨魏廣  
平鉅鹿信都五郡

謹案班志阜城屬勃海昌成屬信都續志安平國阜城故昌成郭注作邑成亦誤也

上黨郡長子縣鹿谷山濁漳水所出東至鄴入清漳

山海經發鳩之山漳水出焉東流注于河郭璞曰或曰出長  
子縣鹿谷山而東至鄴入清漳水經濁漳水出上黨長子縣  
西發鳩山注漳水出鹿谷山與發鳩連麓而在南元和郡縣  
志發鳩山在縣西南六十五里濁漳水出焉

上黨郡屯留縣桑欽言絳水出西南東入漳

水經注絳水西出穀遠縣東之發鳩谷東逕屯留縣故城南



其水東北流入于漳故桑欽云絳水出屯留西南東入漳魏書地形志樂陽有望天嶺絳水所出屯留水自寄氏界來入濁漳

魏郡武始縣漳水東至邯鄲入漳

水經注漳水又東北逕西門豹祠前漳水右與枝水合其水上承漳水於邯鄲會西而東別與邯水合張晏曰漳水之別自城西南與邯山之水會今城旁猶有溝渠存焉其水又東北入于漳

謹案御覽引水經注溢水出石鼓山東流注于漳謂之合河段氏玉裁錢氏站云志漳水當作溢水是也

魏郡武安縣欽口山白渠水所出東至列人入漳

水經注漳水又東北逕列人縣故城南于縣右合白渠故瀆白渠水出武安縣欽口山東南流逕邯鄲縣南歷邯溝縣故



城東又東逕肥鄉縣故城北逕列人右會漳津今無水

魏郡武始縣又有拘澗水東南至邯鄲入白渠

水經注白渠水逕邯鄲縣南又東與拘澗水合水導源武始東山入白渠北俗猶謂是水爲拘河也

趙國邯鄲縣堵山牛首水所出東入白渠

山海經錫山牛首之水出焉而東流注于釜水水經注白渠水又東又有牛首水入焉水出邯鄲縣西堵山東入邯鄲城東南流注拘澗水又東入白渠太平寰宇記邯鄲縣牛首水在縣西北三十里又名曲河

真定國緜曼縣斯洩水首受大白渠東至鄴入河

水經注斯洩水首受大白渠大白渠首受綿蔓水又云斯洩



水又東逕西梁城南又東北逕樂信縣故城南又東入衡水  
衡水又北逕鄆縣故城東案鄆卽鄆字之誤志大河本自黎  
陽以下至章武入海東漢後改從漯川至于乘入海其故道  
遂爲淇漳寇易滹沱諸水所亂此云入河者入漳河也

常山郡蒲吾縣大白渠水首受緜蔓水東南至下曲陽入斯洌  
水經注緜蔓水又東逕烏子堰又東謂之大白渠地理志所  
謂首受緜蔓水者又東南逕關縣故城北又東逕宋子縣故  
城北又東逕敬武縣故城北又東謂之斯洌水地理志曰大  
白渠東南至下曲陽入斯洌河者也又云白渠枝水又東逕  
下曲陽城北又東逕貫縣入斯洌水案上艾縣緜蔓水本至  
蒲吾入虡池水此入斯洌水者其枝津耳水經注反以爲正



流矣

常山郡元氏縣泚水

舊本作沮水誤

首受中邱西山窮泉谷東至堂陽

入黃河

說文解字泚水在常山山海經敦與之山泚水出于其陰而東流注于彭水郭璞曰今泚水出中邱縣西窮泉谷東注于堂陽縣入于漳水文選注引漢書恆山郡元氏縣有泚水首受中邱西出窮泉谷入黃河案黃河者漳河也或改作橫河非是

常山郡石邑縣井陘山在西泚水所出東南至廩陶入泚

說文解字泚水出常山石邑井陘東南入于泚

常山郡房子縣贊皇山石濟水所出東至廩陶入泚



續漢志房子縣贊皇山濟水所出說文解字濟水出常山房  
子贊皇山東入泚元和郡縣志濟水源出贊皇山西北流去  
縣南十里此自別一濟水應劭以爲四瀆誤也

信都國信都縣故章河故虓池皆在北東入海禹貢絳水亦入  
海

案云故者是章河虓池之故道非作志時所行之道也史記  
集解鄭玄云地理志降水在信都南水經注絳瀆又北逕信  
都東散入澤渚西至于信都城東連于廣川縣之張甲故瀆  
同歸于海鄭玄注尚書曰水土之名變易世失其處見降水  
則以爲絳水故依而廢讀或作絳字非也

代郡靈邱縣瀧水東至文安入大河過郡五行九百四十里



山海經高是之山澹水出焉東流注于河說文解字澹水起  
代郡靈邱東入河水經澹水出代郡靈邱縣高是山又東過  
博陵縣南又東北入于易易水又東過泉州縣南東入于海  
太平寰宇記靈邱縣嘔夷水一名澹水出縣西北高是山又  
云高是山在縣西北七十里過代常山中山涿勃海五郡  
常山郡上曲陽縣恆山北谷在西北禹貢恆水所出東入澹

水經澹水又東南過中山上曲陽縣北恆水從西來注之注  
澹水又東逕左人城南又東恆水從西來注之自下澹水兼  
納恆川之通稱焉卽禹貢所謂恆衛旣從也史記索隱恆水  
出恆山上曲陽縣東入澹水

中山國北新成縣桑欽言易水出西北東入澹



水經注易水東逕容城縣故城南易水又東湓水注之水側有渾湓城易水逕其南東合漚水故桑欽曰易水出北新城西北東入漚自下漚易互受通稱矣

中山國望都縣博水東至高陽入河

水經注漚水又東北逕侯世縣故城南又東北逕陵陽亭東又北左會博水水出望都縣故城北又東北左則濡水注之自下博水亦兼濡水通稱矣應劭曰博水出中山望都入河案漚亦名河入河者卽入漚也下同

中山國北平縣徐水東至高陽入博又有盧水亦至高陽入河水經注博水又東北徐水注之水西出廣昌縣東南大嶺下又逕北平縣又東流入博水又云漚水又東逕唐縣故城南



涖水之右盧水注之水上承城內盧水池地理志曰盧水出北平疑爲疎闊駟應劭之徒咸亦謂是矣

中山國曲逆縣蒲陽山蒲水所出入濡又有蘇水亦東入濡水經注濡水出蒲陰縣西昌安郭南其水自源東逕其縣故城南亦謂之爲曲逆水也又東與蘇水合水出縣西南近山東北流又東逕其縣入濡濡水又東得蒲水口水出西北蒲陽山又東南流逕蒲陰縣故城北又東入濡又東北逕樂城南又東入博水

代郡廣昌縣涑水東南至容城入河過郡三行五百里

說文解字涑水起北地廣昌東入河水經巨馬河出代郡廣昌縣涑山又東南過容城縣北又東過勃海東平舒縣北東



入于海注卽涑水也東南流逕迺縣故城東謂之巨馬河地理志曰涑水東南至容城入河卽濡水也過代上谷涿三郡涿郡故安縣閭鄉易水所出東至范陽入濡水亦至范陽入涑周禮注易出故安水經易水出涿郡故安縣閭鄉西山東過范陽縣南又東過容城縣南又東過安次縣南又東過泉州縣南東入于海注易水逕范陽縣故城南又東與濡水合濡水又東南流于容城縣西北合易水而注巨馬水案志不記濡水所出水經注於此下云濡水出故安縣西此窮獨山山谷與上文出蒲陰縣西昌安郭南者異源同流亦涑易諸水之互受通稱也說文解字濡水出涿郡故安東入涑今本作入涑涑水經注又引作入深深渠皆傳寫之譌



涿郡涿縣桃水首受涑水分東至安次入河

水經注聖水自涿縣東與桃水合首受涑水于徐城東南良鄉西分垣水世謂之南沙溝卽桃水也桃水東逕陽鄉東注聖水聖水又東逕勃海安次縣故城南又東南流注于巨馬河

涿郡良鄉縣垣水東南至陽鄉入桃

水經注垣水上分涑水于良鄉縣之桃水世謂之北沙溝又東逕涿縣北東流注于桃故應劭曰垣水東入桃闕駟曰至陽鄉注之

代郡鹵城縣庫池河東至參合入庫池別過郡九行千三百四十里從河東至文安入海過郡六行千三百七十里

謹案別下當有河字



山海經泰戲之山虓沱之水出焉又云虓沱水出晉陽城南而西至陽曲北而東注勃海入越章武北郭璞曰今虓沱水出雁門鹵城縣武夫山元和郡縣志繁峙縣泰戲山一名武夫山在縣東南九十里案水經注本有虓沱篇今傳寫亡矣過代雁門定襄太原常山鉅鹿河間涿勃海九郡從河所過六郡無攷

謹案錢坫曰從河當作別河過代雁門常山信都河間勃海六郡

太原郡上艾縣繇曼水東至蒲吾入虓池水

水經注綿蔓水上承桃水出樂平郡之上艾縣南逕蒲吾縣故城西又東南流逕綿蔓縣故城北自下通謂之綿蔓水史記正義綿蔓水一名阜將一名洄星自并州流入井陘界古今注永平十年作常山呼沱河蒲吾渠通漕船也



常山郡靈壽縣禹貢衛水出東北入虓池

周禮注衛水在靈壽續漢志靈壽衛水出太平寰宇記引水經云衛水出常山靈壽縣西東北入滹沱河

常山郡南行唐縣牛飲山白陘谷

舊本作白陸谷

滋水所出東至新市

入虓池水

山海經高是之山滋水出焉而南流注于虓沱說文解字滋水出牛飲山白陘谷東入呼沱

魏郡武安縣又有滹水東北至東昌入虓池河過郡五行六百一里

說文解字滹水出魏郡武安東北入呼沱水隋書地理志武安郡武安縣有滹水過魏趙廣平鉅鹿信都五郡



趙國襄國縣西山澗水所出東北至任入滹又有蓼水澗水舊本

澗水作馮水誤皆東至朝平入澗

說文解字澗水出趙國襄國之西山東北入滹又云澗水出趙國襄國東入澗隋書地理志襄國郡龍岡縣有澗水太平寰宇記龍岡縣澗水一名澧水俗謂之百泉出縣東平地蓼水一名達活水水經云蓼水出襄國石井岡

常山郡中邱縣逢山長谷渚水舊本誤作諸水所出東至張邑入澗舊本

誤作入濁

說文解字渚水在常山中邱逢山東入澗太平寰宇記內邱縣蓬鵲山在縣西六十三里地理志云中邱蓬山長谷之水所出



廣平國南和縣列葭水東入瀕

武五子傳燕刺王使人祠葭水晉灼曰葭水在廣平水經注  
衡水自堰分爲二其右水東北注出石門謂之長蘆水蓋變  
列葭之名也太平寰宇記南和縣列家水在縣西南十里

河閒國樂成縣虘池別水首受虘池河東至東光入虘池河

水經濁漳水又東北至樂成陵縣別出北瀆注衡漳于縣無  
別出之瀆出縣北者乃虘池別水分虘池故瀆之所纏絡也

河閒國弓高縣虘池別河首受虘池河東至平舒入海

謹案此東平舒

水經注衡漳又東逕弓高縣故城北又東逕建成縣故城南  
成平縣故城在北城南北相值又東左會虘池別河故瀆又  
東北合清河謂之合口清漳枝瀆又逕東平舒縣故城南又



東北分爲二水一水北注虘池與清漳亂流而東注于海

勃海郡成平縣虘池河民曰徒駭河

謹案水經注成平縣東有虘池河故瀆

溝洫志許商以爲古說九河之名有徒駭胡蘇鬲津今見在成平東光鬲界中爾雅九河徒駭郭璞曰今在成平

雁門郡陰館縣累頭山治水所出東至泉州入海過郡六行千一百里

武五子傳燕刺王使人祠台水晉灼曰地理志台水在雁門說文解字灤水出雁門陰館累頭山東入海或曰治水也水經灤水出雁門陰館縣東北過代郡桑乾縣南又東至漁陽雍奴縣西入笥溝注笥溝沽水之別名也案台灤皆聲相近過雁門代上谷涿廣陽漁陽六郡



代郡平舒縣祁夷水北至桑乾入沽

周禮并州其川嘔夷注嘔夷祁夷與出平舒水經注祁夷水出平舒縣東逕平舒縣之故城南澤中又東北流逕代城西又北逕桑乾故城東而北流注于灤

代郡且如縣于延水出塞外東至廣寧入沽

水經注于延水出塞外柔元鎮西長川城南小山山海經曰梁渠之山修水出焉東南流逕且如縣故城南于延水出縣北塞外卽修水也于延水又南逕且居縣故城南其水東南流注于灤水

敦煌郡冥安縣南籍端水出南羌中西北入冥澤

太平寰宇記籍端水一名冥水地理志云冥安縣南籍端水



出南羌中西北入冥澤者也應劭曰冥水出北入其澤元和  
郡縣志晉昌縣冥水自吐谷渾界流入大澤東西二百六十  
里南北六十里

敦煌郡龍勒縣氏置水出南羌中東北入澤

謹案漢志水上有  
氏置字原脫今補

李陵傳至東浚稽山南龍勒水上

張掖郡鱣得縣千金渠西至樂涇入澤中羌谷水出羌中東北  
至居延入海過郡二行二千二百里

後漢書注令鮮水在今甘州張掖縣界一名合黎一名羌谷

水太平寰宇記張掖縣合黎水一名羌谷水鮮水一名覆袁

水亦名張掖河南自吐谷渾界流入太康地記云河北得水

便名爲河塞外有水便名爲海故居延澤亦名海也過張掖



酒泉二郡

酒泉郡祿福縣呼蠶水出南羌中東北至會水入羌谷

太平寰宇記酒泉縣呼蠶水一名潛水亦名羌谷俗謂福祿河西南自吐谷渾界流入會水一名白亭海在縣東北三十里十三州志云眾羌之水所會故曰會水

張掖郡刪丹縣桑欽以爲道弱水自此西至酒泉合黎

說文解字溺水自張掖刪丹西至酒泉合黎餘波入于流沙又云屺山也或曰弱水之所出史記正義合黎水出臨松縣而北流逕張掖故城下又北流至縣北二十三里合弱水弱水自合黎山折而北流逕沙領之西入居延澤行千五百里金城郡臨羌縣有弱水



山海經弱水出昆侖墟西南隅西域傳長老傳聞條支有弱水西王母亦未嘗見括地志弱水有二源俱出女國北阿儻達山一名昆侖山在雍州西南一萬五千三百七十里

武威郡姑臧縣南山谷水所出北至武威入海行七百九十里續漢志姑臧補注地道記曰南山谷水所出水經注馬城河又東北逕武威縣故城東地理志曰谷水出姑臧南山北至武威入海

武威郡倉松縣南山松陝水所出北至摺次入海

續漢志倉松補注地道記曰南山松陝水所出

安定郡鹵縣濯水出西

水無攷



北地郡郁郅縣泥水出北蠻夷中

說文解字泥水出北地郁郅北蠻中續漢志補注引地道記同史記正義泥谷水源出羅川縣東北泥陽源側有泉於泥中潛流二十餘步而流入泥谷

漁陽郡漁陽縣沽水出塞外東南至泉州入海行七百五十里說文解字沽水出漁陽塞外東入海水經沽河從塞外來南過漁陽狐奴縣北與灤餘水合爲潞河又東南至雍奴縣西入笥溝又東南至泉州縣東入于海注沽河出禦夷鎮西北九十里丹花嶺下

上谷郡軍都縣溫餘水東至路南入沽

水經灤餘水出上谷居庸關東又東流過軍都縣南又東流



過薊縣北又北屈東南至狐奴縣西入于沽河案溫灤字之誤

上谷郡且居縣樂陽水出東南入海

水經注沽水又東南與鵲谷水合水有二源南卽陽樂水也  
出且居縣地理志曰水出縣東北流逕大翩山小翩山北歷  
女祁縣故城南世謂之陽曲河又逕赤城西逕其城南東南  
入赤城河河水又東南入沽水

右北平郡無終縣溇水西至雍奴入海過郡二行六百五十里  
隋書地理志漁陽郡無終縣有庚水灋水顏師古曰卽下所  
云入庚者同一水也水經注庚水出右北平徐無縣北塞中  
又南逕北平城西而南入鮑邱水水經鮑邱水南至雍奴縣



北屈東入于海過右北平漁陽二郡

右北平郡俊靡縣灋水南至無終東入庚

說文解字灋水出右北平浚靡東南入庚水經注灋水出右北平浚靡縣東南流世謂之車輦水又東南流又西南逕無終山又西南入于庚水世亦謂之爲柘水也

右北平郡字縣榆水出東

後漢書注鮑邱水出北塞中南流經九莊嶺東俗謂之大榆河

漁陽郡白檀縣洧水出北蠻夷

水經注地理志曰洧水出北蠻夷中又東南流右與要水合又東南流逕白檀縣而東南流入于濡



遼西郡肥如縣玄水東入濡水濡水南入海陽又有盧水南入玄水

水經濡水從塞外來東南過遼西令支縣北又東南過海陽縣西南入于海注玄水出肥如縣東北玄溪西南流逕肥如縣故城南右會盧水水出縣東北沮溪而入于玄水太平寰宇記盧水一名大沮水一名小濡水案此濡水卽今灤河與范陽故安濡水別一川也南入海陽當云南至海陽入海遼西郡臨渝縣渝水首受白狼東出塞外又有侯水北入渝說文解字渝水在遼西臨渝東出塞水經注白狼水出右北平白狼縣東南又北逕黃龍城東又東北出東流分爲二水右水疑卽渝水也地理志曰渝水首受白狼水西南巡山逕



一故城西渝水南流東屈與一水會世名之曰檻倫水疑卽地理志所謂侯水北入渝者也十三州志曰侯水南入渝地理志言蓋自北而南也

遼西郡交黎縣渝水首受塞外南入海

水經注白狼水又西南流注于渝渝水又東南逕一故城東又南逕營邱城西其水東南入海

遼西郡海陽縣龍鮮水東入封大水封大水緩虛水皆南入海水經注封大水出新安平縣西南流逕新安平縣故城西又東南流龍鮮水注之水出縣西北世謂之馬頭水二源俱導南合一川東流注封大水亂流南會新河南流入于海新河又東出海陽縣與緩虛水會水出新安平縣東北世謂之大



龍水東南流逕令支城西西南流與新河合南流入于海

遼西郡案縣下官水南入海又有碣石水賓水皆南入官

水經注新河又東木究水出焉南入海錢坵曰下官木究以  
字形相亂案管子齊桓公征孤竹至卑耳之谿有贊水者水  
經注今自孤竹南出則巨海矣卑耳之川若贊谿者亦不知  
所在也卑耳疑卽下官贊水疑卽賓水字形皆相近

遼西郡狐蘇縣唐就水至徒河入海

太平寰宇記彭盧水卽唐就水後魏輿地圖風土記云水至  
徒河入海與地平故曰平盧今語譌彭盧

遼西郡新安平縣夷水東出塞外

水無攷



遼西郡柳城縣參柳水北入海

水無攷

遼西郡有小水四十八并行三千四十六里

後漢書東夷傳句驪一名貂耳有別種依小水爲居因名曰  
小水貂注魏氏春秋曰遼東郡西安平縣北有小水南流入  
海

遼東郡望平縣大遼水出塞外南至安市入海行千二百五十  
里

山海經潦水出衛皋東東南注勃海入潦陽水經大遼水出  
塞外衛白平山東南入塞過遼東襄平縣西又東南過房縣  
西又東過安市縣西入于海案白平卽皋字之譌



遼東郡高句驪縣遼山遼水所出西南至遼隊入大遼水又有南蘇水西北經塞外

水經又元菟高句驪縣有遼山小遼水所出西南至遼隧縣入于大遼水也郭璞曰元菟高句驪縣有遼山小遼水所出西流注大遼

遼東郡遼陽縣大梁水西南至遼陽入遼

水經注大梁水出北塞外西南流注遼水其水西南流故謂之爲梁水也

遼東郡居就縣室僞山室僞水所出北至襄平入梁也

水經注小遼水又西南逕襄平縣爲淡淵晉永嘉三年涸小遼水又逕襄平入大梁水案室僞水不見於水經注疑卽此



水也

遼東郡番汗縣沛水出塞外西南入海

說文解字沛水出遼東番汗塞外西南入海應劭曰汗水出塞外西南入海案汗疑卽沛字之譌師古作沛汗兩音

元菟郡西蓋馬縣馬訾水西北入鹽難水西南至西安平入海過郡二行二千一百里

太平寰宇記馬訾水一名鴨綠水水源出東北靺鞨白山去遼東五百里經國內城又西與一水合卽鹽難水也二水合流西南至安平城入高麗之地

樂浪郡涓水縣涓水西至增地入海

說文解字涓水出樂浪鏤方東入海一曰出涓水縣水經涓



水出樂浪鏤方縣東南過于臨沮縣東入于海

樂浪郡吞列縣分黎山列水所出西至黏蟬入海行八百二十里

山海經朝鮮在列陽東海北山南列陽屬燕郭璞曰列亦水名也今在帶方張晏曰朝鮮有濕水洌水汕水三水合爲洌水

樂浪郡含資縣帶水西至帶方入海

水無攷



漢志水道疏證卷一

宿松羅忠濟初校

黟縣黃士陵覆校

陽湖吳翊寅再覆校







漢志水道疏證卷二

臨海洪頤煊撰

河東郡垣縣禹貢王屋山在東北沁水所出東南至武德入河  
軼出滎陽北地中又東至琅槐入海過郡九行千八百四十里  
山海經王屋之山聯水出焉而西流注于泰澤郭璞曰地理  
志王屋山沁水所出聯沁聲相近畢尚書曰泰澤當卽滎澤  
禹貢導沁水東流爲濟說文解字沁水出河東東垣縣王屋  
山東爲沛水經濟水出河東垣縣東王屋山爲沁水又東至  
溫縣西北爲濟水案志不言沛水者略也水經濟水又南當  
鞏縣北南入于河與河合流又東過成皋縣北又東過滎陽  
縣北又東北至礫磧南東出過滎澤北又東至乘氏縣西分



爲二其一水東南流其一水從縣東北流入鉅野澤過乘氏縣又東北過甲下邑入于河又東北入海注濟水東北至甲下邑南東歷琅槐縣故城北山海經濟水絕鉅野注渤海入齊琅槐東北者也過河內河南陳畱濟陰東郡泰山濟南齊千乘九郡

陳畱郡封邱縣濮渠水首受沛東北至都關入羊里水過郡三行六百三十里

水經濟水過乘氏縣與濮渠合注北濟自濟陽縣北又東北逕定陶縣故城北又東北與濮水會上承濟水於封邱縣卽地理志所謂濮渠水首受濟者也水經又云瓠子河出東郡濮陽縣北河東至濟陰句陽縣爲新溝又東北過廩邱縣爲



濮水注濮水支渠又東北逕句陽縣之小成陽城東故垂亭西而北入瓠河地理志曰濮水首受沛于封邱縣東北至都關入羊里水者也過東郡濟陰山陽三郡

泰山郡萊蕪縣原山淄水所出東至博昌入沛又禹貢汶水出西南入沛汶水桑欽所言

續漢志泰山郡萊蕪有原山淄水出水經淄水出泰山萊蕪縣原山又東北過臨淄縣東又東過利縣東又東北入于海括地志淄州淄川縣東北七十里原山淄水所出案淄水自博昌以下入馬車瀆與時水通稱水經言入海者據下流而言也說文解字桑欽說汶水出泰山萊蕪西南入沛水經汶水出泰山萊蕪縣原山西南過嬴縣南又西南過壽張縣北



又西南至安民亭入于濟

齊郡臨淄縣如水西北至梁鄒入沛

水經注京相璠曰今臨淄唯有濇水西北入沛卽地理志之如水矣又云時水又屈而逕杜山北又有濇水注之水出時水東去臨淄城十八里所謂濇中也西北入于時水時水又西北逕西安縣故城南又西至石洋堰分爲二水枝津西北至梁鄒入沛

齊郡昌國縣德會水西北至西安入如

水經注時水自西安城西南分爲二水枝津別出西流德會水注之水出昌國縣黃山西北流逕昌國縣故城南又北流注時水



齊郡鉅定縣馬車瀆水首受鉅定東北至琅槐入海

水經注淄水又東逕巨淀縣故城南縣東南則巨淀湖淄水又東北馬車瀆水注之首受巨淀淀卽濁水所注也又云淄水入馬車瀆亂流東北逕琅槐故城南又東北至皮邱坎入于海

千乘郡博昌縣時水東北至鉅定入馬車瀆

水經注時水出齊城西北二十五里平地出泉卽如水也時水又屈而東北逕博昌城北又東北逕巨淀縣故城北又東北逕廣饒縣故城北東北入淄水淄水入馬車瀆

齊郡廣縣爲山濁水所出東北至廣饒入鉅定

說文解字濁水出齊郡厲嬌山東北入鉅定呂忱曰濁水一



名溷水出廣縣爲山水經注時水通謂濁水爲陽水亦或通名之爲繩水濁水又北逕益城西又北流注巨淀

齊郡臨朐縣石膏山洋水所出東北至廣饒入鉅定

說文解字洋水出齊臨朐高山東北入鉅定水經注世又謂陽水爲洋水余案羣書盛言洋水出臨朐縣而陽水導源廣縣兩縣雖鄰川土不同於事疑焉

甌川國東安平縣菟頭山女水所出東北至臨甌入鉅定

水經注巨淀之右又有女水注之水出東安平縣之菟頭山東北流逕東安平縣故城南東北入巨淀

齊陰郡乘氏縣泗水東南至睢陵入淮過郡六行千一百一十里



說文解字泗受沛水東入淮史記集解引鄭玄云泗水出濟陰乘氏水經濟水東至乘氏縣西分爲二其一水東流者過乘氏縣南又東過方與縣北爲菏水又東過湖陸縣南東入于泗水又東南過沛縣東北又東過彭城縣北又東至下邳睢陵縣南入于淮過濟陰山陽沛楚東海臨淮六郡

魯國卞縣泗水西南至方與入沛過郡三行五百里

山海經泗水出魯東北而南西南過湖陵西而東南注東海入淮陰北郭璞曰今泗水出魯國卞縣西南至高平湖陵縣東南經沛國彭城下邳至臨淮下相縣入淮水經濟泗水出魯卞縣北山西南過魯縣北又南過方與縣東又屈東南過湖陸縣南又東過沛縣東又東南過彭城縣東北又東南過下



邳縣西又東南入于淮案志泗水自方與入沛以下沛水卽爲泗水上文所記泗水入淮卽沛水也水經濟泗分流故注云濟與泗亂故沛納兩稱又云濟水與泗水渾濤東南流至角城同入淮皆與志異

謹案依志泗水自方與入沛過魯山陽二郡今作三郡當有譌脫

魯國蕃縣南梁水西至胡陵入沛渠

水經注泗水又左會南梁水地理志曰水出蕃縣今縣之東北平澤出泉若輪焉發源成川西南流逕魯國蕃縣故城東又屈逕城南地理志曰其水西流注于沛經無南梁之名而有涓涓之稱疑卽是水也

山陽郡湖陵縣禹貢浮于淮泗通于河水在南

說文解字蒗澤水在山陽胡陵禹貢浮于淮泗達于蒗水經



泗水又南過方輿縣東蒗水從西來注之注蒗水卽沛水之所苞注以成湖澤也而東與泗水合于湖陵縣西六十里穀庭城下太平寰宇記蒗水卽沛水一名五丈溝去縣十里東南流合泗水案今尙書作達于河釋文曰河如字說文作蒗古字通用

山陽郡平樂縣泡水東北至沛入泗

說文解字泡水出山陽平樂東北入泗水經注豐水又東逕平樂縣右合泡水水上承睢水于下邑縣界又東逕沛縣故城南豐水於城南東注泗卽泡水也元和郡縣志沛縣泡水卽豐水也西去縣百五十步

梁國蒙縣獲水首受留獲渠東北至彭城入泗過郡三行五百



漢志卷之九 通志卷之二  
三  
五十里

水經獲水出汧水于梁郡蒙縣北又東過蕭縣南又東至彭城縣北東入于泗注獲水於彭城西南迴而北流逕彭城獲水又東轉逕城北而東注泗又云汧水又東逕濟陽考城縣故城南爲菑獲渠過梁沛楚三郡

陳畱郡浚儀縣睢水首受狼湯水東至取慮入泗過郡四行千三百六十里

水經汧水出陰溝于浚儀縣北注陰溝卽蒗蕩渠也案汧通作汧杜預曰汧水自滎陽受河睢水受汧東經陳畱梁國譙郡沛國至彭城縣入泗水經睢水出梁郡鄆縣又東過睢陽縣南又東過相縣南屈從城北東流當蕭縣南入于陂注睢



水又東南流逕下相縣故城南東南流入于泗經止蕭縣非也太平寰宇記輿地志云汴水自滎陽受睢水東至陳畱彭城南入泗過陳畱梁沛臨淮四郡

泰山郡蓋縣臨樂于山洙水所出西北至蓋入池水又沂水南至下邳入泗過郡五行六百里

說文解字洙水出泰山蓋臨樂山北入泗水經洙水出泰山蓋縣臨樂山西南至卞縣入于泗注或作池字蓋字誤也周禮注沂山沂水所出也在蓋說文解字沂水出東海費東西入泗一曰沂水出泰山蓋水經沂水出泰山蓋縣艾山南過琅邪臨沂縣東又南過開陽縣東又南過下邳縣西南入于泗過泰山魯城陽琅邪東海五郡



泰山郡南武陽縣冠石山治水所出南至下邳入泗過郡二行九百四十里

水經注沂水又南逕臨沂縣故城東有治水注之水出泰山南武陽之冠石山應劭地理風俗記曰武水出焉蓋水異名也案注不云入泗而云入沂泗水篇又有武水云至下邳入泗而其出不云南武陽冠石山然則志言入泗者亦由沂以入泗也過泰山東海二郡

琅邪郡東莞縣術水南至下邳入泗過郡三行七百一十里

水經流水出琅邪東莞縣西北山東南過其縣東又東南過莒縣東又南過陽都縣東入于沂注流水又南逕東海厚邱縣南入淮陽宿預縣注泗水地理志所謂至下邳注泗者也



經言於陽都入沂非矣過琅邪城陽東海三郡

東海郡容邱縣桐水

舊本作  
祠水誤

東南至下邳入泗

水經注桐水出西北東海容邱縣東南至下邳入泗

東郡東武陽縣禹貢漯水東北至千乘入海過郡三行千二百里

續漢志東武陽濕水出說文解字濕水出東郡東武陽入海  
應劭曰漯水出東武陽東北入海案白河平三年河決平原  
流入濟南千乘東漢以後河遂與漯合故水經敘漯水于河  
水之後史記禹釃二渠以引其河孟康曰其一則漯川永平  
中王景修汴渠汴河分流導之千乘入海卽漯水也水經注  
今漯水上承河水于武陽縣東南又逕高唐縣故城東又東



北逕千乘縣二城間亂河枝流而入于海過東郡平原千乘三郡

平原郡高唐縣桑欽言漯水所出

續漢志高唐濕水出說文解字桑欽云出平原高唐水經河水又東北過高唐縣東注河水于縣漯水注之水自城東北逕東武陽縣故城南應劭曰縣在武水之陽然則漯水亦或武水矣桑氏所言蓋津流所出次于是閒也

琅邪郡箕縣禹貢濰水

舊本濰或作維或作淮皆字之省

北至都昌入海過郡

三行五百二十里

說文解字濰水出琅邪箕屋山東入海水經濰水出琅邪箕縣濰山又東北過都昌縣東又東北入于海注濰水導源濰



山許慎呂忱云維水出箕屋山淮南子曰維水出覆舟山蓋廣異名也元和郡縣志莒縣維山在縣東北三十八里維水所出也案過琅邪高密北海三郡

琅邪郡折泉縣折泉水北至箕入維

水經注維水東北逕箕縣故城西又西析泉水注之水出析泉縣北松山東南流逕析泉縣東又東南逕仲固山東北流入于維太平寰宇記莒縣今縣東北分流山之北有涓水源其涓水卽古析泉水也

琅邪郡橫縣故山久台水所出東南至東武入維

水經注維水又北右合盧水卽久台水也地理志曰水出琅邪橫縣故山西北流逕昌縣故城西東北流逕東武縣故城



漢志九道疏卷二  
東而西北入維太平寰宇記諸城縣盧水出縣東南廬山亦名久台水

琅邪郡靈門縣壺山浯水所出東北入維

說文解字浯水出琅邪靈門壺山東北入維水經注浯水出崑山世謂之巨平山也東北逕姑幕縣故城東又東北逕平昌縣故城北又東北流而注于維水

琅邪郡朱虛縣東泰山汶水所出東至安邱入維

說文解字汶水出琅邪朱虛東泰山東入維水經汶水出朱虛縣泰山北過其縣東又北過濇于縣西又東北入于維注伏琛晏謨並言水出縣東南崑山山在小泰山東者也太平寰宇記北海縣汶水在縣東南六十里源出沂水縣小泰山



入縣界合維水入海

北海郡桑犢縣覆甌山漑水所出東北至都昌入海

說文解字漑水出北海桑犢覆甌山東北入海水經注漑水出桑犢亭東覆甌山北逕斟亭西北又北逕寒亭西而入別畫湖又云別畫湖亦曰朕懷湖湖東西二十里南北三十里東北入海

留川國劇縣義山蕤水所出北至壽光入海

水經注堯水出劇縣南角崩山卽故義山也水卽蕤水矣又東北逕東西壽光二城間又東北注巨洋地理志曰蕤水自劇東北至壽光入海沿其徑趣卽是水也

東萊郡睡縣聲洋丹水所出東北入海



太平御覽引此作梁山丹水所出太平寰宇記聲洋水謂之清陽水

東萊郡曲成縣陽邱山治水所出南至計斤入海

舊本作至沂入海

說文解字治水出東萊曲城陽邱山南入海

琅邪郡朱虛縣凡山丹水所出東北至壽光入海

水經注地理風俗記曰丹山在西南丹水所出東入海丹凡字相類丹水有二源各導一山西丹水自凡山北流逕劇縣故城東丹水注之水出方山北逕縣合西丹水而亂流丹水又東北逕望海臺東東北注海

琅邪郡却縣膠水東北至平度入海

謹案今志作東至平度水經注引作北至平度

水經膠水出黔陬縣膠山北過其縣西又北過夷安縣東又



北過當利縣西北入于海注齊記曰膠水出五弩山蓋膠山之殊名也魏書地形志東武郡梁鄉縣有五弩山膠水出焉

琅邪郡柜縣柜艾舊本作根艾誤水東入海

水經注柜艾水出黔陬縣西南柜艾山卽齊記所謂黔艾山也東北流逕柜縣故城西又東北逕黔陬城西又東入海太平寰宇記高密縣故柜城俗亦謂之王城有柜艾水東入海因名

琅邪郡裨縣夜頭水南入海

太平寰宇記輿地志云向水南至海夜頭向水蓋異名也

南陽郡平氏縣禹貢桐柏大復山在東南淮水所出東南至淮浦入海過郡四行三千二百四十里謹案志作至淮陵入海



續漢志南陽郡平氏桐柏大復山淮水出說文解字淮水出  
南陽平氏桐柏大復山東南入海水經淮水出南陽平氏縣  
胎簪山東北過桐柏山又東至廣陵淮浦縣入于海注淮水  
與醴水同源西流爲醴東流爲淮潛流地下三十許里東出  
桐柏之大復山南謂之陽口故經云東北過桐柏也郭璞曰  
今淮水出義陽平氏縣桐柏山山東北經汝南汝陰淮南譙  
國下邳經淮陰縣入海過南陽江夏汝南廬江九江臨淮六  
郡今本作四者字之誤也

汝南郡定陵縣高陵山汝水所出東南至新蔡入淮過郡四行  
千三百四十里

山海經汝水出天息山在梁勉鄉西南入淮極西北水經汝



水出河南梁縣勉鄉西天息山東南過其縣北又東南過潁川郟縣南又東南過定陵縣北又東南過鄆縣北又東南過汝南上蔡縣西又東南過平輿縣南又東至原鹿縣南入于淮說文解字汝水出宏農盧氏還歸山東入淮郭璞曰今汝水出南陽魯陽縣大孟山東北至河南梁縣東南經襄城潁川汝南至汝陰襄信縣入淮案汝水一源出盧氏一源出魯陽大孟山一源出梁天息山皆定陵之上流淮南子汝出猛山高誘曰猛山一曰高陵山晉地道記曰高陵山汝水所出所言皆與志合過汝南潁川二郡今作四者後人所改也南陽郡魯陽縣堯山澁水所出東北至定陵入汝又有昆水東南至定陵入汝



說文解字澧水出南陽魯陽堯山東北入汝水經澧水出南陽魯陽縣西之堯山東北過潁川定陵縣西北又東過鄧縣南東入于汝注澧水東逕西不羹亭南于定陵城北東入汝又云汝水又東南昆水注之水出魯陽縣唐山東南流逕昆陽縣故城西又東逕定陵城南又東注汝水

南陽郡雒縣衡山澧水所出東至鄧入汝

說文解字澧水出南陽雒縣衡山東入汝水經注作醴水出南陽雒縣亦云導源雒衡山卽山海經之衡山也是山在雒縣界故世謂之雒衡山醴水東流歷唐山下東逕鄧縣故城南左入汝

南陽郡舞陰縣中陰山瀕水所出東至上蔡入汝



山海經葳山視水出焉東南流注于汝水郭璞曰視宜爲瀨  
瀨水今在南陽也說文解字瀨水出南陽舞陽中陽山入潁  
水經瀨水出無陰縣東上界山東過吳房縣南又東過濯陽  
縣南又東過上蔡縣南東入汝

廬江郡雩婁縣決水北至蓼入淮又有灌水亦北至蓼入決過  
郡二行五百一十里

說文解字廬江有決水出于大別山水經決水出廬江雩婁  
縣南大別山北過其縣東又北過安豐縣東又北入于淮說  
文解字灌水出廬江雩婁北入淮水經注決水自縣西北流  
逕蓼縣故城東又逕其北灌水注之其水導源廬江金蘭縣  
西北東陵鄉大蘇山卽淮水也灌水東北逕蓼縣故城西而



北注決水過廬江六安二郡

廬江郡金蘭西北有東陵鄉淮水出

胡渭曰淮當作灌水經注褚先生所謂神龜出於江灌之間  
嘉林之中蓋謂此水也全祖望曰龜筴傳作江淮淮卽灌也  
非出桐柏之淮

廬江郡潯縣泚山泚水所出北至壽春入芍陂

水經泚水出廬江潯縣西南霍山東北東北過六縣東北入  
于淮注泚字或作潁潁水又西北逕六安縣故城西又西北  
分爲二水芍陂出焉又云陂周一百二十許里在壽春縣南  
八十里

六安國六縣如谿水首受泚東北至壽春入芍陂



水經注泄水上承泚水於麻步川西北出歷濡谿謂之濡水也案濡如聲相近全祖望曰如谿水卽濡谿水也

潁川郡陽城縣陽乾山潁水所出東南至下蔡入淮過郡三行千五百里

山海經潁水出少室山入淮說文解字潁水出潁川陽城乾山東入淮水經潁水出潁川陽城縣西北少室山又東南至慎縣東南入于淮注今潁水有三源奇發右水出陽乾山之潁谷中水導少室左水出少室南東合潁水杜預曰潁水出河南陽城縣陽乾山東南經潁川汝陰至淮南下蔡縣入淮元和郡縣志潁陽縣陽乾山在縣東二十五里過潁川汝南沛三郡



潁川郡陽城縣陽城山洧水所出東南至長平入潁過郡三行五百里

說文解字洧水出潁川陽城山東南入潁水經洧水出河南密縣西南馬領山又東南過新汲縣東北又東南入于潁水亦言出潁川陽城山山在陽城縣之東北蓋馬領之統目焉洧水又南逕長平縣故城西又東逕習陽城西西南折入潁元和郡縣志密縣馬領山在縣南十五里洧水所出過潁川河南汝南三郡

河南郡滎陽縣有狼湯渠首受洧東南至陳入潁過郡四行七百八十里

水經河水又東過滎陽縣北蒗蕩渠出焉注大禹塞滎澤開



之以通淮泗卽經所謂蒗蕩渠也又云渠出滎陽北河東南過中牟縣之北又東至浚儀縣又屈南至扶溝縣北其一者東南過陳縣也注地道記云城北有故沙沙水又東而南屈逕陳城東謂之百尺溝又東南流注于潁又云潁水又東南至新陽縣北蒗蕩渠水從西北來注之注蒗蕩渠者百尺溝之別名也過河南潁川汝南淮陽四郡

河南郡密縣有大騶山潁水所出南至臨潁入潁

說文解字潁水出河南密縣大隗山南入潁水經潁水出河南密縣大騶山東南入于潁注大騶卽具茨山也元和郡縣志密縣大騶山在縣東南五十里潁水源出于此又長社縣潁水俗名勅水經縣西其流出密縣大騶山



漢志九道疏卷二  
沛郡城父縣夏肥水東南至下蔡入淮過郡二行六百二十里  
水經注夏肥水上承沙水于城父縣右出東南流逕城父縣  
故城南又東逕思善縣之故城南左合雞水而亂流東注俱  
入于淮過九江沛二郡

淮陽國扶溝縣渦水首受狼湯渠東至向入淮過郡三行千里  
說文解字過水受淮陽扶溝狼湯渠東入淮水經陰溝水出  
河南陽武縣蒗蕩渠東南至沛爲過水又東南至下邳淮陵  
縣入于淮過淮陽沛二郡

陳畱郡陳畱縣魯渠水首受狼湯渠東至陽夏入渦渠

水經注沙水又東南逕牛首鄉東南魯溝水出焉亦謂之宋  
溝也又逕陳畱縣故城南又東南逕圉縣故城北又東南至



陽夏縣故城西又南入渦

臨淮郡淮浦縣游水北入海

水經注淮水于縣枝分北爲游水歷朐縣又北逕東海利城  
縣故城之東又北逕祝其縣故城西左逕琅邪計斤縣故城  
之西又東北逕贛榆縣北東北入海



宿松羅忠濟初校

黟縣黃士陵覆校

陽湖吳翊寅再覆校

漢志水道疏證卷二



漢志水道疏證卷三

臨海洪頤煊撰

蜀郡湔氐道禹貢嶧山在西徼外江水所出東南至江都入海  
過郡七行二千六百六十里

山海經岷山江水出焉東北流注于海說文解字江水出蜀  
湔氐徼外嶧山入海水經岷山在蜀郡氐道縣大江所出注  
岷山卽瀆山又謂之汶阜山在徼外江水所導也郭璞曰今  
江水出汶山郡升遷縣岷山東南經蜀郡犍爲至江陽東北  
經巴東建平宜都南郡江夏弋陽安豐至廬江南界東北經  
淮南下邳至廣陵郡入海案禹貢嶧導漾東流爲漢至東  
匯澤爲彭蠡東爲北江入于海岷山導江至東迤北會于匯



東爲中江入於海志於蕪湖下云中江出西南東至陽羨入海毗陵下云北江在北東入海吳下云南江在南東入海大江至江都入海以北岸言之曰江都以南岸言之曰毗陵大江卽北江也與禹貢所言異矣過蜀犍爲巴郡南郡長沙江夏廬江丹陽廣陵九郡今作七者字之誤也

蜀郡有小江八并行千九百八十里

釋名江其也小水流入其中所公共也水經注益州記曰大江泉源卽今所間始發羊膊嶺下緣崖散漫小水百數殆未濫觴矣

蜀郡郫縣禹貢江沱在西東入大江

說文解字沱江別流也出嶧山東別爲沱郭璞曰沱水自蜀



郡都安縣湔山與江別而東流水經益州沱水在蜀郡汶江縣西南其一在郫縣西南皆還入江注江水又東別爲沱開明之所鑿也

蜀郡江原縣郫水首受江南至武陽入江

水經注郫江水出江原縣首受大江東南流至武陽縣注于江元和郡縣志唐興縣郫江一名阜江經縣東二里

蜀郡臨邛縣僕于水東至武陽入江過郡二行五百一十里

水經注江水至蜀郡臨邛縣與布僕水合水出徼外成都西沈黎郡水從縣西分爲二流一水又東逕臨邛縣入文井水文井水又東逕江原縣又東至武陽縣天社山下入江過蜀犍爲二郡



蜀郡汶江縣澍水出徼外南至南安東入江過郡三行三千四  
十里江沱在西南東入江

說文解字澍水出蜀汶江徼外東南入江水經注澍水出徼  
外逕汶江道呂忱曰澍水出蜀許慎以爲澍水也南至南安  
入大渡水大渡水又東入江過蜀越巂犍爲三郡

蜀郡青衣縣禹貢蒙山谿大渡水東南至南安入澍

水經注青衣縣南有蒙水卽大渡水也水發蒙谿東南流與  
澍水合括地志蒙山在雅州嚴道縣南十里元和郡縣志羅  
目縣大渡水在縣南二百步

蜀郡嚴道邛來山邛水所出東入青衣

山海經來山江水出焉東流注于大江郭璞曰邛來山今在



漢嘉嚴道縣南江水所自出也水經江水又東南過犍爲武陽縣青衣水沫水從西南來合而注之又云青衣水出青衣縣西蒙山注青衣水又東邛水注之水出漢嘉嚴道邛來山東至蜀郡臨邛縣東入青衣水元和郡縣志榮經縣邛來山在縣西五十里

犍爲郡南廣縣汾關山符黑水所出北至犍道入江又有大涉水北至符入江過郡三行八百四十里

水經注江水又與符黑水合水出寧州南廣郡南廣縣導源汾關山北流有大涉水注之水出南廣縣北流注符黑水又北逕犍道入江案水經注大涉水無過郡疑別有正流遠出徼外其源不可攷矣



越嶠郡遂久縣繩水出徼外東至熨道入江過郡二行千四百里

水經江水又東南過熨道縣北若水淹水合從西來注之又云淹水出越嶠遂久縣徼外東南至蜻蛉縣又東過姑復縣南東入于若水說文解字淹水出越嶠徼外東入若水案淹水卽繩水也因字形相近而別水經注繩水出徼外山海經曰巴遂之山繩水出焉東南流分爲二水其一枝流東出逕廣柔縣東流注于江其一水南逕旄牛道至大茆與若水合自下亦通謂之爲繩水矣過越嶠犍爲二郡

益州郡弄棟縣東農山母血水出北至三絳南入繩行五百一

十里

謹案三絳郡國志作三縫是也



續漢志補注地道記連山無血水所出水經注母血水出益州郡弄棟縣東農山母血谷北流逕三絳縣南北入繩

益州郡牧靡縣南山臘谷涂水所出西北至越嶲入繩過郡二行千二十里

說文解字涂水出益州牧靡南山西北入繩水經注涂水出建寧郡之牧靡縣南山涂水導源臘谷西北流至越嶲入繩過益州越嶲二郡

蜀郡旄牛縣鮮水出徼外南入若水若水亦出徼外南至大茆入繩過郡二行千六百里

水經若水出蜀郡旄牛徼外東南至故關爲若水也南過越嶲卽都縣西直南至會無縣又東北至犍爲朱提縣西又東



北至犍道縣入于江注若水東南流鮮水注之一名州江大渡水出徼外至旄牛道南流入于若水又云若水至犍道縣繩水瀘水孫水淹水大渡水隨決入而納通稱是以諸書錄記羣水或言入若或言注繩亦或言至犍道入江正是異水沿注通爲一津後漢書注瀘水一名若水出旄牛徼外經朱提至犍道入江過蜀越嶲二郡

越嶲郡臺登縣孫水南至會無入若行七百五十里

張揖曰孫水出臺登縣南至會無入若水水經注孫水出臺高縣卽臺登縣也孫水一名白沙江南流逕邛都縣又南至會無入若水

越嶲郡蘇示縣尸江在西北



太平寰宇記蘇祁縣居池山海經云越巂蘇祁有居池今謂曲池是也案尸江疑居池之譌

蜀郡緜虢縣玉壘山湔水所出東南至江陽入江過郡三行千八百九十里

說文解字湔水出蜀郡緜虢玉壘山東南入江水經注湔水出縣道亦曰緜虢縣之玉壘山下注江過蜀廣漢犍爲三郡廣漢郡雒縣章山雒水所出南至新都谷入湔

水經江水又東過江陽縣南洛水從三危山東過廣魏洛縣南東南注之注洛水出洛縣漳山亦言出梓潼縣柏山洛水又南逕新都縣與縣水合又與湔水合亦謂之郫江也元和郡縣志雒縣雒水在縣東一里



廣漢郡縣竹縣紫巖山縣水所出東至新都北入雒

續漢志縣竹補注地道記曰有紫巖山縣水之所出焉華陽國志縣水出紫巖山徑縣竹入洛東流過資中會江陽注縣水西出縣竹縣至江陽縣方山下入江元和郡縣志縣竹縣紫巖山在縣西北三十里

隴西郡西縣禹貢嶓冢山在西西漢水所出南入廣漢白水東南至江州入江過郡四行二千七百六十里

水經注華陽國記漢水有二源東源出武都氏道縣漾山爲漾水禹貢導漾東流爲漢是也西源出隴西西縣嶓冢山會白水逕葭萌入漢案常璩所言與志合水經漾水出隴西氏道縣嶓冢山東至武都沮縣爲漢水又東南至廣魏白水縣



西又東至葭萌縣東北與羌水合誤以東漢水之源合于西漢水又華陽國記于西漢水下誤云始源曰沔後人因紛紛致疑皆誤也過隴西武都廣漢巴四郡

廣漢郡甸氏道白水出徼外東至葭萌入漢過郡一行九百五十里

山海經白水出蜀而東南注江入江州城下水經注白水西北出于臨洮縣西南西傾山東南逕陰平道故城南卽廣漢之北也又東南逕白水縣故城東又東南逕吐費城南東南流注漢水

隴西郡羌道羌水出塞外南至陰平入白水過郡二行六百里水經羌水出羌中參狼谷又東南至廣魏白水縣與漢水合



又東南過巴郡閬中縣又南至墊江縣東南入于江注彼俗謂之天池白水矣地理志曰出隴西羌道東南流逕宕昌城東又東逕宕婆川城東南北注羌水元和郡縣志丹嶺縣湫池在縣西八十里蓋古之天池大澤白水之源蓋出此也過隴西廣漢二郡謹案戴校本經注云南北注羌水五字近刻之譌蓋羌水至白水縣與西漢水合又南入江也廣漢郡剛氏道涪水出徼外南至墊江入漢過郡二行千六十九里

說文解字涪水出廣漢剛氏道徼外南入漢水經涪水出廣魏涪縣西北南至小廣魏與梓潼合又西南至小廣魏南入于墊江過廣漢巴二郡

廣漢郡梓潼縣五婦山馳水所出南入涪行五百五十里



水經注五婦山又曰五婦塢馳水所出一曰五婦水亦曰潼水也其水導源山中南逕梓潼縣自縣西逕涪城東又南入于涪水

巴郡胸忍縣容毋水所出南入江

水經注江水又東右得將龜谿口華陽記曰胸忍縣出靈龜咸熙元年獻龜於相府言出自此谿也全祖望曰漢志胸忍縣容毋水所出卽此谿也

巴郡宕渠縣瀹水西南入江不曹水出東北南入瀹徐谷

說文瀹水出巴郡宕渠西南入江水經潛水出巴郡宕渠縣又南入于江注縣西北有不曹水南逕其縣下注潛水水經又云江水又東北至巴郡江州縣東強水涪水漢水白水宕



山海經沅水出象郡鄧成西入東注江說文解字沅水出牂  
柯故且蘭東北入江水經沅水出牂柯且蘭縣爲旁溝水又  
東至鄧成縣爲沅水又東至長沙下雋縣西北入于江後漢  
書注沅水出牂柯故且蘭東北經辰州潭州岳州經洞庭湖  
入江過牂柯長沙二郡

武陵郡無陽縣無水首受故且蘭南入沅行八百九十里

水經注無水出故且蘭南流至無陽故縣無水又東南入沅  
武陵郡義陵縣鄺梁山序水所出西入沅

水經注序溪水出武陵郡義陵縣鄺梁山西北流逕義陵縣  
又西北入于沅

武陵郡辰陽縣三山谷辰水所出南入沅行七百五十里



水經注沅水又東逕辰陽縣南東合辰水水出縣三山谷東南流逕其縣北又右會沅水名之爲辰溪口元和郡縣志麻陽縣三山谷一名辰山在縣西南百三十五里

武陵郡索縣漸水東入沅

水經注沅水又東入龍陽縣有澹水出漢壽縣西陽山南流東折逕其縣南關駟以謂興水所出東入沅而是水又東歷

諸湖方南注沅亦曰漸水也

謹案戴校水經注西陽山作西楊山

武陵郡充縣西原山西水所出南至沅陵入沅歷山澧水所出東至下雋入沅過郡二行千二百里

謹案今志至沅陵入沅下有行千二百里五字當補

水經注西水導源益州巴郡臨江縣故武陵之充縣西原山東南流逕無陽故縣南東逕西陽故縣南又東逕沅陵縣北



又南注沅水水經澧水出武陵充縣西歷山東過其縣南又東過零陽縣之北又東過作唐縣北又東至長沙下雋縣西北東入于江注澧水又東南注于沅水過武陵長沙二郡

零陵郡都梁縣資水所出東北至益陽入沅過郡二行千八百里

水經江水又東至長沙下雋縣北澧水沅水資水合東流注之又云資水出零陵都梁縣路山東北過夫夷縣又東北過邵陵縣之北又東北過益陽縣北又東與沅水合于湖中東北入于江也注資水出武陵郡無陽縣界唐紉山蓋路山之別名也過零陵長沙二郡

牂柯郡警縣不狼山警水所出東入沅過郡二行七百三十里



續漢志補注地道記不狼山警水所出水經注縣有警水出  
警邑西不狼山東與溫水合案志警水入沅水經注警水入  
延江水延江水入西水西水入沅皆互受之通稱也過牂柯  
武陵二郡

犍爲郡符縣溫水南至警入黠水黠水亦南至警入江

水經溫水一曰煖水出犍爲符縣而南入黠水黠水亦出符  
縣南與溫水會闕駟謂之闕水俱南入警水警水於其縣而  
東注于延江水說文解字溫水出犍爲涪南入黔水案黔黠  
聲相近

犍爲郡漢陽縣山關谷漢水所出東至警入延

水經注漢水出犍爲漢陽縣山關谷東至警入延江水也



零陵郡零陵縣陽海山湘水所出北至鄱入江過郡二行二千五百三十里

續漢志零陵陽朔山湘水出說文解字湘水出零陵陽海山北入江水經湘水出零陵始安縣陽海山東北過零陵縣東又北過下雋縣西又北至巴邱山入于江注卽陽朔山也應劭曰湘出零山蓋山之殊名也元和郡縣志全義縣湘水出東南八十里陽朔山下過零陵長沙二郡

長沙國茶陵縣泥水西入湘行七百里

水經沘水出茶陵縣上鄉西北過其縣西又西北過攸縣南又西北過陰山縣南又西北入于湘注地理志謂之泥水也桂陽郡郴縣耒山耒水所出西至湘南入湖



水經耒水出桂陽郴縣南山又北過其縣之西又北過便縣之西又西北過耒陽縣之東又北過酃縣東北入于湘

桂陽郡耒陽縣春山春水所出北至酃入湖過郡二行七百八十里

續漢志補注湘中記有春水注湘水經注十三州志曰大別水南出耒陽縣太山北至酃縣入湖案春泰字形相近疑卽此水也過桂陽長沙二郡

隴西郡氐道禹貢養水所出至武都爲漢

說文解字漾水出隴西柏道東至武都爲漢古文作濇水經漾水出隴西氐道縣嶓冢山東至武都沮縣爲漢水注關駟云漢或爲漾漾水出崑崙西北隅至氐道重源顯發而爲漾



水許慎呂忱並言漾水出隴西獮道東至武都爲漢水案漢中記曰蟠冢以東水皆東流蟠冢以西水皆西流卽其地勢源流所歸故俗以蟠冢爲分水嶺漾水源出蟠冢以東故禹貢於東漢水亦言蟠冢導漾也今本說文作柏道水經注引作獮道皆字之誤

武都郡武都縣東漢水受氏道水一名沔過江夏謂之夏水入江

尚書禹貢蟠冢導漾東流爲漢史記集解引鄭玄云地理志瀋水出隴西氏道至武都爲漢至江夏謂之夏水山海經蟠冢之山漢水出焉而東南流注于沔應劭曰沔水自江別至南郡華容爲夏水過郡入江故曰江夏史記正義夏水口在



荊州江陵縣東南二十五里

武都郡沮縣沮水出東狼谷南至沙羨入江過郡五行四千里  
說文解字沔水出武都沮縣東狼谷東南入江或曰入夏水  
水經沔水出武都沮縣東狼谷中又東南過江夏雲杜縣東  
夏水從西來注之又南至江夏沙羨縣北南入于江注沔水  
一名沮水關駟曰以其初出沮淢然故曰沮水後漢書注沔  
水源出武都東狼谷中卽漢水之上源也案沮沔互通故說  
文解字水經並以沮水爲沔水志沮沔各自入江然記過郡  
于沮水下沮大而沔小故東京以後卽以沮水爲沔水耳過  
武都漢中南陽南郡江夏五郡

武都郡河池縣泉街水南至沮入漢行五百二十里



漢書卷三  
華陽國志泉街縣水入沮合漢水經注泉街水出河池縣東南入沮縣會于沔沔水又東南逕沮水戍而東南流注漢曰沮口所謂沔漢者也

漢中郡南鄭縣旱山池水所出東北入漢

續漢志南鄭補注華陽國志曰有池水從旱山來水經注池水出旱山俗謂之獠子水夾慨諸田散流左注漢水

漢中郡安陽縣鬻谷水出西南北入漢左谷水出北南入漢

水經沔水又東過魏興安陽縣南沔水出自旱山北注之注沔水出西南而東北入漢左谷水出西南而東北入漢左谷水出西北即壻水也水經又云沔水出漢中南鄭縣東南旱山北至沔陽縣入于沔鄭康成曰安陽之潛其尾入漢案鬻



涔潛古字通用

謹案水經注載校云左谷水出西南而東北入漢十一字係衍文蓋水出西北而東南入漢也

南陽郡酈縣育水出西北南入漢

山海經支離之山清水出焉南流注于漢郭璞曰今育水出酈縣西北山南入漢說文解字清水出宏農盧氏山東南入沔或曰酈山西水經清水出宏農盧氏縣攻離山又西過鄧縣東南入于沔注清水導源宏農東流逕酈縣故城北右扶風武功縣褒水亦至衙領南至南酈入沔

水經注褒水西北出衙領山東南逕大石門歷故棧道下谷又南逕褒縣故城東又南流入于漢元和郡縣志武功縣褒水源出縣西衙領川斜水與褒水同源而派分在縣北五里宏農郡盧氏縣熊耳山在東又有育水南至順陽入沔又有涔



水東南至魯陽入沔皆過郡二行六百里

水經均水出析縣北山南流過其縣之東又南當涉都邑北南入于沔注均水發源宏農郡之盧氏縣熊耳山又東南流注逕其縣又南流逕順陽縣西又南流注于沔水故地理志謂之育水言熊耳之山育水出焉又東南至順陽入于沔案水經注以清水當酈縣育水而以均水當盧氏育水然二水源既相同流亦不遠其入漢入沔疑亦枝津各別耳水經注汧水出宏農郡盧氏縣之熊耳山東南逕酈縣北又逕西鄂縣南又東南流注于清水地理志曰熊耳之山出三水汧水其一焉東南至魯陽入沔是也皆過宏農南陽二郡

宏農郡析縣黃水出黃谷鞠水出鞠谷俱東至酈入湍水



水經湍水出酈縣北芬山南流過其縣東又南過冠軍縣東又東南至新野縣東入于清注黃水出北芬山黃谷南逕丹水縣南注于丹水菊水出西北石澗山芳菊谿亦言出析谷東南流入于湍

宏農郡丹水縣丹水出上雒冢領山東至析入鈞

水經丹水出京兆上洛縣西北冢領山東南過其縣南又東南過商縣南又東南至于丹水縣入于汧案汧鈞均古字通用

宏農郡上雒縣又有甲水出秦嶺山東南至錫入沔過郡二行五百七十里

水經注甲水出秦嶺山東南流又東逕上庸郡北又東南逕



魏興郡之興晉縣南又東右入漢水太平寰宇記上洛縣秦嶺山在縣西南一百里高九百五十丈過宏農漢中二郡

漢中郡旬陽縣北山旬水所出南入沔

水經注旬水出旬山又東南逕旬陽縣南注漢華陽國志洵陽縣洵水所出太平寰宇記洵水水經云北出洵山東南流經縣北至縣東又南入沔

漢中郡房陵縣淮山淮水所出東至中廬入沔又有筑水東至筑陽亦入沔

續漢志補注巴漢志曰維山維水所出水經沔水又東過中

廬縣東淮水自房陵淮山東流注之案維淮字之異應劭曰筑水出漢中房陵東入沔水經注沔水又南逕筑陽縣東又



南筑水注之杜預以爲彭水也水出梁州新城郡魏昌縣界東逕筑陽縣故城南又東流注于沔太平寰宇記穀城縣筑水在縣南百步陸澄地理志云筑水會沔水之處謂之筑口南郡臨沮縣禹貢南係荆山在東北漳水所出東至江陵入陽水陽水入沔行六百里

說文南漳水出南郡臨沮水經漳水出臨沮縣東荆山東南至枝江縣入于沮杜預曰漳水出新城沔鄉縣南至荆山東南經襄陽南郡當陽縣入沮山海經荆山漳水出焉而東南注于睢案睢卽沮字之異淮南子沮出荆山蓋卽以漳水爲沮水也水經注陽水上承江陵縣赤湖又東入華容縣又北逕竟陵縣西又北注于沔



南郡華容縣夏水首受江東入沔行五百里

水經夏水出江津于江陵縣東南又東過華容縣南又東至江夏雲杜縣入于沔注闕駟十三州記曰江別入沔爲夏水源鄭玄注尚書滄浪之水言今謂之夏水來同故世變名焉劉澄之著永初山川記云夏水古文以爲滄浪漁父所歌也案志沔水過江夏謂之夏水入江夏水又首受江入沔此卽東漢水之正流禹貢所謂滄浪之水也東京以後沔水奪入沮水故說文解字水經並以沮水爲沔水而東漢水之正流反晦矣

廬江郡廬江出陵陽東南北入江

山海經廬江出三天子都入江彭澤西水經廬江水出三天



子都北過彭澤縣西北入于江

廬江郡尋陽縣禹貢九江在南皆東合爲大江

劉歆曰湖漢等九水入彭蠡故言九江矣應劭曰江自廬江尋陽分爲九張揖曰九江在廬江尋陽縣南皆東合爲大江豫章郡贛縣豫章水出西南北入大江

水經注豫章水導源東北流逕南壠縣北贛川石岨水急行難傾波委注六十餘里又北逕贛縣東豫章水右會湖漢水又云地理志曰豫章水出贛縣西南而北入江蓋控引眾流總成一川雖稱謂有殊言歸一水矣故後漢郡國志曰贛有豫章水雷次宗云似因此水爲其地名雖十川均流而此源最遠故獨受名焉案志以湖漢爲經流水經以贛水爲經流



皆此水也

豫章郡雩都縣湖漢水東至彭澤入江行千九百八十里

水經注湖漢水出雩都縣導源西北流逕金雞石又西北逕贛縣東西入豫章水

長沙國安成縣廬水東至廬陵入湖漢

水經注十三州志稱廬水西出長沙安復縣東至廬陵入湖漢者也

豫章郡宜春縣南水東至新淦入湖漢

水經注牽水西出宜春縣牽水又東逕吳平縣牽水又東逕新淦縣而注于豫章水湖漢及贛並通稱也案牽南因字形相近而譌



豫章郡南城縣盱水西北至南昌入湖漢

水經注盱水出南城縣西北流逕南昌縣南西注贛水

豫章郡建成縣蜀水東至南昌入湖漢

水經注濁水出康樂縣又東逕望蔡縣又東逕建成縣又東至南昌縣東流入于贛水太平寰宇記高安縣蜀水在縣北三里漢書地理志云蜀水源出縣內小界山東流五百九十里入南昌縣與鄣水合案鄣水卽贛水今志脫行五百九十里六字

豫章郡餘汗縣餘水在北至鄢陽入湖漢

水經注餘水東出餘汗縣北至鄢陽縣注贛水

豫章郡鄱陽縣鄱水西入湖漢



續漢志鄱陽有鄱水水經注鄱水出鄱陽縣東西逕其縣南  
又西流注于贛

豫章郡艾縣脩水東北至彭澤入湖漢行六百六十里

水經注脩水出艾縣西東北逕豫寧縣又東北逕永脩縣又  
東北注贛水

豫章郡南壘縣彭水東入湖漢

水經贛水出豫章南壘縣注山海經曰贛水出聶都山東北  
流注于江入彭澤西也班固稱南壘縣彭水所發東入湖漢  
水庾仲初謂大庾嶠水北入豫章注于江者也

丹陽郡石城縣分江水首受江東至餘姚入海過郡二行千二  
百里



水經沔水與江合流又東過彭蠡澤又東至石城縣分爲二其一東北流其一又過毗陵縣北爲大江又東至會稽餘姚縣入于海案東至餘姚入海說文解字江水東至會稽山陰爲浙江卽此分江水也水經注以爲南江過丹陽會稽二郡丹陽郡陵陽縣桑欽言淮水出東南北入大江

水經注旋谿水出陵陽山下逕陵陽縣西桑欽曰淮水出縣之東南北入大江其水又北歷蜀由山左合旋谿而同注南江元和郡縣志上元縣淮水源出縣南華山在丹陽湖孰兩縣界西北流經秣陵建康二縣之間入于江

丹陽郡宛陵縣清水西北至蕪湖入江

說文解字冷水出丹陽宛陵西北入江應劭曰冷水出丹陽



宛陵西北入江案洽清聲相近

丹陽郡蕪湖縣中江出西南東至陽羨入海

水經中江在丹陽蕪湖縣西南東至會稽陽羨入於海太平  
寰宇記宐興縣荆溪在縣南二十步漢志云中江首受蕪湖  
東至陽羨入海卽此溪也宋景定建康志中江舊逕溧陽縣  
界古三江之一今永陽江一名九陽江一名潁陽江在縣西  
北三十五里卽其遺跡

會稽郡毗陵縣北江在北東入海

續漢志毘陵北江在北水經北江在毘陵北界東入于海又  
云沔水與江合流又東至石城縣分爲二其一東北流其二  
又過毗陵縣北爲大江注江卽北江也



會稽郡吳縣南江在南東入海

水經注地理志曰江水白石城東出逕吳國南爲南江案今志無此文

會稽郡太末縣穀水東北至錢唐入江

水經注穀水源西出太末縣又東入錢唐縣而左入浙江元和郡縣志須江縣穀水江在縣東南一里

廣陵國江都縣渠水首受江北至射陽入湖

水經注中瀆水首受江於廣陵郡之江都縣舊江水道也自江東北通射陽湖地理志所謂渠水也西北至末口入淮續漢志射陽注有梁湖地道記曰有博支湖

蜀郡禹貢桓水出蜀山西南行羌中入南海



水經桓水出蜀郡岷山西南行羌中入于南海注尚書禹貢和夷底績鄭立曰和讀曰桓地理志曰桓水出蜀郡蜀山西南行羌中者也

益州郡來唯縣勞水出徼外東至麋伶入南海過郡三行三百六十里

水經注僕水又東至來唯縣入勞水水出徼外東逕其縣與僕水合東至交州交趾郡麋伶縣南流入于海過益州越巂交趾三郡

越巂郡青蛉縣僕水出徼外東南至來唯入勞過郡二行千八百八十里

水經注布僕水出徼外成都西沈黎郡水從縣西布僕來分



爲二流其一水南逕越嶲郡都縣西東南至雲南郡之蜻蛉縣入於僕水又東至來唯縣入勞水過越嶲益州二郡

益州郡葉榆縣貪水首受青蛉南至邪龍入僕行五百里

水經注蜻蛉水出蜻蛉縣西東逕其縣下貪水出焉又云貪水出蜻蛉縣上承蜻蛉水逕葉榆縣又東南至邪龍縣入于僕

益州郡秦臧縣牛蘭山卽水所出南至雙柏入僕行八百二十里

水經注卽水出秦臧縣牛蘭山南流至雙柏縣東注僕水

益州郡嶲唐縣周水首受徼外又有類水西南至不韋行六百里



續漢志舊唐補注華陽國志曰有同水從徼外來案同周字之譌水經注類水出舊唐縣西南流曲折又北流東至不韋縣注蘭倉水

牂柯郡西隨縣麋水西受徼外東南至麋伶入尚龍谿過郡二行千一百六里

續漢志補注地道記麋水西受徼外東至麋伶入尚龍谿水經益州葉榆河過不韋縣入牂柯郡西隨縣北爲西隨水又東出進桑關過交趾麋伶縣北東入海注馬援言從麋伶水道出進桑自西隨至交趾崇山接險水路三千里過牂柯交趾二郡

牂柯郡都夢縣壺水東南至麋伶入尚龍谿過郡二行千一百



六十里

水經注劉澄之曰沅水自壺頭枝分跨三十三渡逕交阯龍  
編縣東北入于海脈水尋梁乃非關究案續漢志沅陵有壺  
頭山沅水不應至交阯故水經注以爲疑疑劉澄之所云者  
卽此壺水因名近而譌過牂柯交阯二郡

牂柯郡夜郎縣豚水東至廣鬱

水經注豚水東北流逕談稟縣東逕牂柯郡且蘭縣謂之牂  
柯水又東南逕毋歛縣又逕鬱林廣鬱縣爲鬱水

鬱林郡廣鬱縣鬱水首受夜郎豚水東至四會入海過郡四行  
四千三十里

水經注鬱水南自壽洽縣注于海山海經曰鬱水出象郡而



東南注南海入須陵東南者也過牂柯鬱林蒼梧南海四郡  
牂柯郡鐔封縣溫水東至廣鬱入鬱過郡二行五百六十里

水經溫水出牂柯夜郎縣又東至鬱林廣鬱縣爲鬱水又東  
至領方縣東與斤南水合東北入于鬱注鬱水卽夜郎豚水  
也過牂柯鬱林二郡

益州郡銅潯縣談虜山迷水所出東至談橐入溫

續漢志注地道記曰銅虜山米水所出水經注迷水西出益  
州郡銅潯縣談虜山東逕談橐縣右注溫水

益州郡僊元縣池在南橋水所出東至毋單入溫行千九百里  
水經注橋水上承僊元之南池周四十七里一名河水與邪  
龍分浦橋水東流至毋單縣注于溫



牂柯郡句町縣文象水東至增倉入鬱又有盧唯水來細水伐水

水經注文象水導源牂柯句町縣與盧唯水來細水伐水並自縣東歷廣鬱至增倉縣注于鬱水也案三國志諸葛亮傳注引作瀘惟水卽以爲瀘水也

鬱林郡領方縣斤員水入鬱又有橋水

宋祁曰一作斤南水水經溫水又東至領方縣東與斤南水合東北入于鬱又云斤江水出交趾龍編縣東北至鬱林領方縣東注于鬱注地理志又云領方縣而有橋水而字當爲南南橋水也蓋書字誤矣案而今本作又橋作壻師古曰壻音橋皆字之誤

謹案戴校本水經注作字當爲溫非橋水也云領方縣有溫水不當又有橋水橋卽溫字之誤



鬱林郡臨塵縣朱涯水入領方又有斤員水侵離水行七百里  
水經注朱涯水出臨塵縣東北流又東北逕臨塵縣縣有斤  
南水侵離水並逕臨塵東入領方縣流注鬱水又云侵黎水  
出廣州晉興郡行至臨塵入鬱

鬱林郡增會縣驩水首受牂柯東界入朱涯水行五百七十里  
水經注驩水源上承牂柯水東逕增會縣而下注朱涯水又  
云牂柯水又東南逕母斂縣西又東驩水出焉

鬱林郡有小谿川水七并行三千一百一十里

謹案川水疑  
小水之譌

水經浪水又東至蒼梧猛陵縣爲鬱溪又東至高要縣爲大  
水注鬱水出鬱林之阿林縣東逕猛陵縣浪水於縣左合鬱

溪

謹案此條所引水經與  
志無涉當云有鬱谿也



武陵郡鍾成縣玉山潭水所出東至阿林入鬱過郡二行七  
百二十里

說文解字潭水出武陵鍾成玉山東入鬱林水經注潭水出  
武陵郡鍾成縣玉山東流逕鬱林郡潭中縣又逕中畱縣東  
阿林縣西右入鬱水過武陵鬱林二郡

牂柯郡毋斂縣剛水東至潭中入潭

水經注剛水西出牂柯毋斂縣東至潭中入潭

鬱林郡定周縣周水首受毋斂東入潭行七百九十里

水經存水出犍爲郁郅縣東南至鬱林定周縣爲周水又東  
北至潭中縣注于潭注周水又東逕牂柯郡之毋斂縣北而  
東南與毋斂水合矣水首受牂柯水東逕毋斂縣爲毋斂水



漢志卷之三  
又東注于存水存水又東逕鬱林定周縣爲周水蓋水變名也案周水自益州舊唐徼外合毋斂水以同入于潭

益州郡毋輟縣橋水首受橋山東至中畱入潭過郡四行三百二十里

續漢志補注地道記曰有橋水出橋山水經注溫水又東南逕興古郡之毋輟縣東與南橋水合水出縣之橋山東流注于溫又云地理志曰橋水東至中畱入潭又云領方縣而有橋水余診其川流更無殊津正是橋溫亂流故兼通稱作者咸言至中畱入潭潭水又得鬱之兼稱案志橋水自益州分爲二一流逕俞元縣至毋單入溫一流自毋輟至中畱入潭溫潭鬱雖互受通稱而橋水之所入則有別也過益州越嶲



牂柯鬱林四郡

益州郡勝休縣河水東至毋掇入橋

續漢志勝休補注南中志曰有大河從廣百四十里深數十丈地道記曰水東至毋掇入橋水水經注梁水上承河水於俞元縣而東南逕興古之勝休縣又東逕毋掇縣左注橋水案梁水亦河水之別名也

零陵郡零陵縣又有離水東南至廣信入鬱林行九百八十里水經離水亦出陽海山南過蒼梧縣荔浦縣又南至廣信縣入於鬱水注離水與湘水出一山而分源也太平寰宇記湘離同源出分爲二水水在金義嶺上南流爲離水北流爲湘水



桂陽郡桂陽縣沅水南至四會入鬱林過郡二行九百里

說文解字沅水出桂陽縣盧聚山沅浦關爲桂水水經沅水出桂陽縣盧聚東南過含沅縣南出沅浦關爲桂水注山海經謂之湟水徐廣曰湟水一名沅水過桂陽南海二郡

桂陽郡臨武縣秦水東南至潁陽入沅行七百里

說文解字秦水出桂陽臨武入沅水經秦水出桂陽臨武縣南繞城西北屈東流東至曲江縣安甌邑東屈西南流過潁陽縣出沅浦關與桂水合南入于海注南注于鬱而入于海合浦郡臨允縣牢水北至高要入鬱過郡三行五百三十里水經注鬱水又東逕高要縣牢水注之水南出交州合浦郡郡統臨允縣牢水自縣北流逕高要縣入于鬱水過合浦南



海蒼梧三郡

武陵郡鐔成縣康谷水南入海

水無攷

謹案水經浪水出武陵鐔成縣北界沅水谷至番禺西分爲二皆南入于海疑卽此水浪康形聲並相近

蒼梧郡猛陵縣龍山合水所出南至布山入海

續漢志補注地道記曰龍山合水所出

九真郡有小水五十二并行八千五百六十里

水經注九德浦內逕越裳究九德究南陵究竺芝扶南記山溪瀨中謂之究地理志曰郡有小水五十二并行大川皆究之謂也

日南郡西捲縣水入海

水經注漢武帝元鼎六年開日南郡治西捲縣地理志曰水



入海林邑記曰其城治二水之間三方際山南北瞰水東西  
澗浦流湊城下

日南郡有小水十六并行三千一百八十里

水經容容夜縡湛乘牛渚須無無濡營進皇無地零侵黎無  
會重瀨夫省無變由蒲王都融勇外此皆出日南郡西東入  
於海

丹陽郡黟縣漸江水出南蠻中東入海

說文解字漸水出丹陽黟南蠻中東入海水經漸江水出三  
天子都北過餘杭東入於海山海經浙江出三天子都在蠻  
東入海郭璞曰地理志浙江出新安黟縣南蠻中東入海案  
浙當作漸傳寫之譌



會稽郡錢唐縣武林山武林水所出東入海行八百三十里  
水經注縣有武林山武林水所出也關駟曰山出錢水東入  
海吳地記言縣唯浙江今無此水

會稽郡上虞縣柯水東入海

水經注上虞江東逕周市而注永興地理志曰縣有仇亭柯  
水東入海仇亭在縣之東北一十里柯水疑卽江也

會稽郡餘暨縣蕭山潘水所出東入海

水經注上虞江又東北逕永興縣東與浙江合謂之浦陽江  
地理志又云縣有蕭山潘水所出東入海又疑是浦陽江之  
別名也案吳都賦劉逵注引作漢水字之誤

會稽郡鄞縣東南有天門水入海



趙一清曰天門水卽縣之廣平湖及大溪是也

會稽郡句章縣渠水東入海

水經注江水有六谿六谿裂漑入江全祖望曰是卽所謂渠

水者矣

謹案戴校本水經注作江上有谿六谿列漑散入江

宿松羅忠濟初校

黟縣黃士陵覆校

陽湖吳翊寅再覆校

漢志水道疏證卷三



漢志水道疏證卷四

臨海洪頤煊撰

敦煌郡正西關外有蒲昌海

西域傳河有兩源一出葱嶺山一出于闐于闐在南山下其河北流與葱嶺河合東注蒲昌海蒲昌海一名鹽澤者也去玉門陽關三百餘里廣袤三百里水經注河水又東注于泐澤卽經所謂蒲昌海也水積鄯善之東北龍城之西南西接鄯善東連三沙爲海之北隘矣

張掖郡居延縣居延澤在東北古文以爲流沙

山海經流沙出鍾山水經流沙地在張掖居延縣東北注居延澤在其縣故城北尚書所謂流沙者也元和郡縣志張掖



縣居延海在縣東北一千六百里

武威郡武威縣休屠澤在東北古文以爲豬蹏澤

水經都野澤在武威縣東北注縣在姑臧城北三百里東北卽休屠澤也古文以爲豬野也其水上承姑臧武始澤又東北逕武威縣故城東一水北入休屠澤俗謂之爲西海一水又東逕一百五十里入豬野世謂之爲東海通謂之都野矣金城郡臨羌縣有僊海鹽池西有須抵池

後漢西羌傳羌乃去湟中依西海鹽池左右水經注湟水出塞外東逕西王母石室石釜西海鹽池北故闕駟曰其西卽湟水之源也案僊海卽西海也古字通用

朔方郡朔方縣金連鹽澤青鹽澤皆在南



水經注魏土地記曰縣有大鹽池漢置典官鹽池去平城宮千二百里在新秦之中元和郡縣志朔方縣城西南有二鹽池大而青白青者名曰青鹽一名戎鹽入藥分也太平寰宇記靈州青鹽澤按漢書云朔方縣青鹽澤在其南

朔方郡窳渾縣屠申澤在東

水經注河水又北迤西溢于窳渾縣故城東其水積而爲屠申澤東西一百二十里闕駟謂之窳渾澤矣

西河郡穀羅縣武澤在西北

司馬相如傳注文穎曰西河穀羅縣有紫澤在縣西北疑卽此澤趙一清曰武澤本名虎澤唐人避諱改之後漢建武二十八年詔南匈奴居西河美稷之虎澤卽此澤也



上郡膚施縣有帝原水

水經注帝原水西北出龜茲縣東南流又東南注奢延水又逕膚施縣南東入五龍山自下亦爲通稱也

上郡高奴縣有洧水肥可難

水經注清水又東逕高奴縣合豐林水地理志謂之洧水也元和郡縣志膚施縣清水俗名去斤水北白金明縣界流入地理志謂之洧水其肥可然鮮卑謂洧水爲去斤

雁門郡沃陽縣鹽澤在東北

水經注今鹽池西南去沃陽故城六十五里池水澱渟淵而不流東西三十里南北二十里

雁門郡疆陰縣諸聞澤在東北



澤無攷

太原郡鄆縣九澤在北是爲昭餘祁

周禮注昭餘祁在鄆水經注汾水於大陵縣左迤爲鄆澤其  
陂東西四里南北一十餘里陂南接鄆地理志曰九澤在北  
并州藪也俗謂之鄆城泊元和郡縣志介休縣鄆城泊在縣  
東北二十六里周禮并州之藪曰昭餘祁卽鄆城泊也

河東郡安邑縣鹽池在西南

續漢志安邑有鹽池補注雒陽記曰河東鹽池長七十里廣  
七里說文解字河東鹽池袤五十一里廣七里周百一十六  
里水經注城南有鹽池今池水東西七十里南北十七里池  
西又有一池謂之女鹽澤東西二十五里南北二十里在猗



氏故城南

右扶風盩厔縣靈軹渠武帝穿也

溝洫志關中靈軹成國漳渠引諸川如涇曰地理志盩厔有靈軹渠

河南郡滎陽縣卞水馮池皆在西南

後漢書永平十二年夏四月遣將作謁者王吳修汴渠自滎陽至於千乘海口注汴渠卽荇蕩渠也案志卞水不與狼湯渠通也水經注礫磎水出滎陽城西南李澤澤中有水卽古馮池也

河南郡中牟縣圃田澤在西

周禮注圃田在中牟水經注澤在中牟縣西限長城東極官



渡北佩渠水東西四十許里南北二百許里中有沙岡上下二十四浦津流逕通淵潭相接各有名焉元和郡縣志中牟縣圃田澤一名原圃在縣西北七里

河南郡開封縣逢池在東北或曰宋之逢澤也

臣瓚曰汲郡古文梁惠王發逢忌之藪以賜民今浚儀有逢陂忌澤是也水經注池水上承役水于苑陵縣別爲魯溝東南流逕開封縣故城北魯溝南際富城東南八百尺陂卽古之逢澤也括地志逢澤亦名逢池在汴州浚儀縣東南十四里

鉅鹿郡鉅鹿縣禹貢大陸澤在北

尚書鄭注大陸澤名在鉅鹿北爾雅晉有大陸郭璞曰今鉅



水經注卷四  
鹿北廣阿澤是也呂氏春秋趙之鉅鹿高誘曰廣阿澤也元和郡縣志鉅鹿縣大陸澤在縣西北東西二十里南北三十里昭慶縣廣阿澤在縣東二十五里案大陸鉅鹿廣阿皆一澤之別名也

濟陰郡禹貢荷澤在定陶東

水經荷澤在定陶縣東又云荷水又東過湖陸縣南東入于泗水注澤所鍾也杜佑通典曰荷澤在曹州濟陰縣東北九十里故定陶城東北

濟陰郡成陽縣禹貢雷澤在西北

周禮注雷夏在成陽水經雷澤在濟陰成陽縣西北注瓠河又左逕雷澤北其澤藪在大成陽縣故城西北一十餘里其



陂東西二十餘里南北一十五里卽舜所漁也元和郡縣志雷澤縣雷夏澤在縣北郭外

山陽郡鉅野縣大壑澤在北

周禮注大野在鉅野水經大野澤在山陽鉅野縣東北注何承天曰鉅野湖澤廣大南通淮泗北連清濟舊縣故城正在澤中元和郡縣志鉅野縣大野澤一名鉅野在縣東五里南北三百里東西百餘里

梁國睢陽縣禹貢盟諸澤在東北

周禮青州澤藪曰望諸注望諸明都也在睢陽水經明都澤在梁郡睢陽縣東北注尚書導河澤被孟豬孟豬在睢陽縣之東北闕駟十三州記曰不言入而言被者明不常入也水



盛方得覆被矣澤水淼漫俱鍾睢泗元和郡縣志睢陽縣孟諸澤在縣西北十里周迴五十里

琅邪郡長廣縣奚養澤在西

周禮注獫狁在長廣元和郡縣志昌陽縣奚養澤在縣西北四十里

武都郡武都縣天池大澤在縣西

華陽國志武都縣東漢水所出有天池澤水經注天池大澤在西故以都爲目矣常璩范曄云郡居河池一名仇池池方百頃卽指此也元和郡縣志丹嶺縣湫池在縣西八十里通彌山中周迴百餘里蓋古之天池大澤白水之源蓋出此也越巂郡邛都縣有邛池澤



水經注邛都縣漢武帝開邛笮置之縣陷爲池今因名爲邛池南人謂之河續漢志注南中志曰邛都縣東南數里有水名邛廣都河從廣三十里深百餘丈

越巂郡定笮縣步北澤在南

澤無攷

越巂郡姑復縣臨池澤在南

水經注淹水逕縣之臨池澤續漢志注地道記鹽池澤在南

案臨鹽字之誤

越巂郡青蛉縣臨池濇在北

趙一清曰濇卽澤也二縣地界以此而分

益州郡滇池縣大澤在西滇池澤在西北



水經注溫水又西會大澤與葉榆僕水合續漢志滇池有池  
澤補注南中志曰池周二百五十里說文解字滇益州池名  
水經注溫水又西南逕滇池池在縣西北周三百許里上源  
深廣下流淺狹似如倒流故曰滇池也

益州郡葉榆縣葉榆澤在東

水經益州葉榆河出其縣北界注縣之東有葉榆澤葉榆水  
所鍾而爲此川藪也

巴郡閬中縣彭道將池在南彭道魚池在西南

續漢志補注巴漢志曰閬中有彭池大澤太平寰宇記閬中  
縣彭道將池郡國志云彭道魚池在州西南四夷述云州東  
南池東西二里南北約五里州城西南有郭池周約五十畝



二池與漢志注相符

巴郡安漢縣是魚池在南

池無攷

南郡華容縣雲夢澤在南

周禮注雲膏在華容爾雅楚有雲夢郭璞曰巴邱湖是也水經雲夢澤在南郡華容縣之東注自州陵東界逕于雲杜沌陽爲雲夢之藪矣

廬江郡湖陵邑北湖在南

案下吳分壑云壽春合肥受南北湖其地與湖陵相近全祖望曰北湖卽樅陽湖與丹陽郡溧陽縣之南湖隔江對岸未知其審



豫章郡彭澤縣禹貢彭蠡澤在南

續漢志彭澤彭蠡澤在西水經彭蠡澤在豫章彭澤縣西北  
又云沔水與江合流又東過彭蠡澤注尚書禹貢匯澤也鄭  
玄曰漢與江鬪轉東成其澤矣括地志彭蠡湖在江州潯陽  
縣東南五十二里

豫章郡歷陵縣傳易川在南古文以爲敷淺原

水經敷淺原地在豫章歷陵縣南杜佑通典江州潯陽縣有  
蒲塘驛卽漢歷陵縣也驛前有敷淺原原西數十里有敷陽  
山太平寰宇記德安縣敷淺水卽尚書敷淺源也常流不絕  
色頗清冷其源乃接瑞昌縣及鄂州永興界屈曲餘二百里  
方至縣



會稽郡吳縣具區澤在西古文以爲震澤

山海經浮玉之山北望具區郭璞曰具區今吳縣西南太湖也尚書謂之震澤周禮注具區五湖在吳南水經震澤在吳縣南五十里注尚書謂之震澤爾雅以爲具區方員五百里元和郡縣志吳縣太湖在縣西南五十里禹貢謂之震澤周禮謂之具區太平寰宇記澤縱廣二百八十三里周迴三萬七千頃連接四郡界入於海



宿松羅忠濟初校

黟縣黃士陵覆校

陽湖吳翊寅再覆校

漢志水道疏證卷四



